

AD CASUS CONSCIENTIÆ

DE MANDATO

O L I M

EMINENTISSIMI ET REVERENDISSIMI DOMINI DOMINI

PROSPERI LAMBERTINI

S. R. E. CARD. AC BONONIÆ ARCHIEP.

D E I N D E

SANCTISSIMI D.N. PAPÆ

BENEDICTI XIV.

APPENDIX SEXTA,

CONTINENS CASUS RESOLUTOS

Ab Anno MDCCLXIX. usque ad Annum MDCCLXX.
inclusive.


*Opus Confessariis, atque animarum curam gerentibus
perutile ac necessarium.*



V E N E T I I S,

MDCCLXX.

TYPIS BARTHOLOMÆI OCCHI,
SUPERIORUM PERMISSU.





CASUS IN DIÆCESI

ANNO MDCCLXIX.

Ad resolvendum propositi, nunc vero resoluti.

MENSE JANUARIO.

CAS. I. **T**Arquinius cum Samuele (ut fama est) usurario contractum societatis inivit; nimirum, mille aureis pro sua vitili parte mercaturæ expositis; qua cum sibi quingentos lucro jam obligasse prænoverit, a societatis contrahit, quod apud se illius periculum amittendæ non leviter pertimescat.

Qu. Primo: Num liceat cum eo societatem inire, de cujus fide, & honestate dubitatur?

Resp. Triplici modo Samuelem, ut usurarium diffamari potuisse, quod est attendendum, ut innotescat quod ubi genere Tarquinius societatem iniecit. Potuit enim 1. diffamari ut usurarius factus aliquo transeunte, quatenus contractum aliquando fecerit vere usurarium. Potuit 2. diffamari, pluribus quidem tactis interpolatis, sed in quibus, contractus egerit nomine proprio. Potuit 3. habitualiter diffamari tanquam usurarius, non solum in iis, quæ egerit nomine proprio, sed etiam in iis, quæ egerit nomine sociorum, vel quatenus solus ipse contrahat sociorum nomine nullo ipsorum inspectore; vel quatenus etiam alii socii, cum ipso contrahentes usurarii sint; nec ullos habeatur, in cujus honestate possit aliquis conquirere. Hac posita distinctione dico, quod si Samuel primo, vel altero modo usurarius habetur, diffamatio hæc non reddat illicitam societatem Tarquinii. Vel enim sine injuria habitualiter malum præsumere nequit, quem novit semel deliquisse; vel si pluries deliquentem audit, sociorum fides ipsum tuetur, ne ipsum timeat usurarium in iis etiam contractibus, quos est cum ipso celebraturus. Si

A 2

vero

vero tertio modo tamquam usurarius diffamatus est, nullo modo licuit Tarquinio cum ipso societatem inire. Ratio autem est, quod Tarquinus hoc modo operans, operatur, ut ajunt, cum dubio peccati practice practico, dubitans nempe, an Samuelis injustitia determinate influat in eos contractus, quos est cum ipso proxime celebraturus. Operans vero cum dubio peccati practice practico, graviter peccat. Operatur enim sine conscientia distante licitum esse, quod agitur, & se exponit periculo graviter peccandi; quod utrumque, peccatum esse, communis est Doctorum sententia.

CAS. II. Qu. Secundo: Utrum Tarquinus in recensito societatis contractu usuræ labem incurrerit, & ad lucri percepti restitutionem, etiam in *Solidum*, teneatur?

Resp. affirmative pro utraque parte, in hypothese quidem, quod practice dubitans hanc societatem inierit, quam dubitationem confirmare debuit enorme lucrum, quod reportavit. Ratio primæ partis descendit ex dictis. Nam Tarquinus peccavit graviter, quatenus se exposuit periculo committendæ usuræ. Qui autem peccat se exponendo periculo peccandi, ejus peccati fit reus, cujus periculum subit. Ratio secundæ partis desumitur ex communi Doctrina de pluribus in damno illato participantibus. Cum enim unus & idem fuerit contractus Tarquinii, & Samuelis unam & eandem in utroque parit obligationem; atque adeo, Samuele non restituente, teneretur Tarquinus in solidum restituere. Adde autem, quod cum hæc obligatio nascatur a dubio, pro rata dubii æstimari debbit.

CAS. II. Qu. Tercio: Num saltem Tarquinio liceat suam Samueli pecuniam custodiendam permittere?

Resp. cum distinctione. Si enim Samuel habet aliunde pecuniam, qua usuras exerceat; neque Tarquinus hunc finem sibi proponit, ut Samuel per hoc depositum copiosius per usuras lucraretur; sed unice intendit suam pecuniam tutius servare; tunc licite poterit ipsam relinquere Samueli custodiendam; nam in hoc casu utitur ad bonum homine peccatore. Si vero Samuel aut pecuniam aliunde non habeat, aut Tarquinus hunc finem intendat, tunc hoc depositum habet Samueli materiam peccandi, & faciet Tarquinium participem culpæ, quæ est Doctrina Angelici Doctoris 2. v. qu. 78. art. 4. ad 3.

MENSE FEBRUARIO.

CAS. I. Theodulphus Confessarius ex fortuita probati Auctoris lectione in cognitionem venit, se ex ignorantia culpabili absolvisse Pœnitentem ab obligatione restitutionis, & quidem in grave damnum cujusdam Titii Mercatoris.

Qu. Primo: Utrum Theodulphus peccaverit contra proprium munus Confessarii?

Resp. affirmative. Confessarius enim destitutus noticia earum obligationum, quæ per communiora peccata contrahi solent, ut sunt restitutiones bonorum, satisfactiones pro injuria, & alia id genus, neque habet mediocrem illam scientiam, quæ omnino necessaria est ad ea discernenda, quæ debent ab ipso judicari. Quapropter si conscius suæ insufficiencie ministerio Confessionis se ipsum exponit, gravis culpæ fit reus, cum

5
cum perverte, & inique Sacramentali iudicio se ingerat, licet imperitus
iudex, & Doctor ignarus exilat.

CAS. II. Qu. Secundo: Utrum possit extra Confessionem de ejusmodi
restitutionis obligatione pœnitentem admonere, quin Sacramentale si-
lentium violetur?

Resp. cum Divo Thoma 4. dist. 21. q. 3. art. 1. quæst. 1. ad 3. abso-
lute loquendo non esse adhibendum remedium peccatis, nisi eo modo,
quo deseruntur; & proinde iis delatis in foro conscientie, in eodem fo-
ro adhibendum esse. Quamquam enim manifestatio extra Confessionem
facta soli pœnitenti, proprie loquendo non sit fractio sigilli; est tamen,
ut inquit Sorus, quoddam genus quasi revelationis, quod sigillum offen-
dit. Dixi absolute loquendo; Nam si pœnitens, vel prior ipse loqua-
tur de hac restitutione, tamquam in Confessione manifestata, vel Con-
fessario petenti det liberam, & expressam licentiam, absque injuria Sa-
cramentalis silentii poterit Confessarius contractum in Confessione au-
ditum cum pœnitente commemorare, atque ipsum admonere de obli-
gatione restitutionis. Quæ sententia inter Theologos nunc est commu-
nissima. Quod enim ex veteribus quidam cum Durando opponebant,
jus sigilli Sacramentalis non solum pertinere ad pœnitentem, sed etiam
ad reverentiam Sacramenti, & Communiratem fidelium, cui pœnitens
renunciare non potest, id in re nostra locum non habet. Nam cum agi-
tur de gravi causa, & habetur expressa pœnitentis licentia, cessat ra-
tio secreti naturalis, tollitur odiositas Confessionis, nec Sacramento intro-
gatur injuria.

An vero pœnitente hanc facultatem denegante possit Confessarius sine fra-
ctione sigilli suum errorem corrigere, variant Auctores. Affirmant ali-
qui cum Suarez disp. 31. sec. 5. n. 3. cum & ex una parte Confessari-
us proprie non loquatur extra Confessionem, sed solum perficiat, quæ
antea inchoata, & impetfecta remanserant; ex altera vero nihil loqua-
tur de Confessione, sed solum emendet malum consilium. Negant ve-
ro communius, cum hac etiam manifestatione reddatur odiosa Confes-
sio, quæ odiositas omnino est devitanda.

CAS. III. Qu. Terrio: An si pœnitens nequeat reperiri, & damnum
emergat Mercatori, ad illud rescarciendum Confessarius ipse teneatur.

Resp. affirmative. Confessarius enim, qui lata culpa positive de obligavit
pœnitentem a restitutione, ad quam tenebatur, actu positivo peccavit
contra iustitiam, & sicuti consulens damnum censetur causa moralis
ejusdem damni, & si nequeat consilium suum retrahere, aut alia ra-
tione damnum impedire, tenetur rescarcire de suo; ita Confessarius in
re nostra, si nequeat pœnitentem adire, suumque errorem corrigere,
teneretur omnino rescarcire de suo damnum, quod emergit Mercatori.

M E N S E M A R T I O.

CAS. I. Filibertus Sacerdos inter Missarum Solemnia, dum Canonem
dicit, gravissimis anghur scrupulis, ex quo adverterit, Sub-
diaconum plus Aquæ ultra morem in Sacrum Calicem profudisse.

Qu. Primo: Quænam Aquæ quantitas, juxta Ecclesiæ præscriptum, mis-
ceri debeat Vino, ut Consecratio Calicis licite peragatur?

Resp. Super hac re ante nonum Ecclesiæ sæculum nihil legi a Majoribus
consi-

constitutum. Hoc enim permittebatur ministrorum arbitrio; dummodo aqua vinum non superaret. Cum autem abusus irreperiret progressu temporis, diversis successively decretis repressi sunt. Sic in Concilio Triburiensi Canonē decimo nono statutum est, *duas saltem in Calice debere esse vini partes, tertiam aqua*, non quod aquæ quantitas tertiam partem necessario debeat æquare, sed quod ad minus debeat vini quantitas esse duplo major, quam aquæ. Ineunte sæculo XIII. Honorius tertius summus Pont. de Cel. Mis. c. *periculosius*, ad quemdam Archiep. his verbis referipit: *Perniciosius in tuis partibus inolevit abusus, videlicet, quod majori quantitate de aqua ponitur in Sacrificio, quam de vino, cum secundum rationabilem consuetudinem Ecclesiæ generalis plus in ipso sit de vino, quam de aqua ponendum, ideoque Fraternitati tuæ mandamus, quatenus id non facias, nec in tua Provincia fieri patiaris*. Idem vero sæculo decimo quinto ab Eugenio quarto statutum in Decreto pro Instructione Armenorum, ubi declarat summus Pontifex: *Aquam modicissimam esse Calicis infundendam*. Habetur etiam Constitutio Pii quinti ad Archiepiscopum Tarracoensem, qua nonnullos redarguit, *qui non guttam aquæ, ut fieri debet, sed plus aqua, quam vini in Calicem infundebant, quod omnino corrigi, & emendari præcepit*. Ad quod emendandum erat olim statutum in quibusdam Ecclesiis, ut Sacri Ministri aquam vino miscendam parvo cucleari primum exciperent, & deinde in Calicem funderent, quem morem adhuc servant Carthusiani. Constat itaque, ex Ecclesiæ præscriptio modicissimam aquam esse vino infundendam, ut Calicis consecratio licite peragatur.

CAS. II. Qu. Secundo: Quamvis Viri supra Aquam requiritur, ut valida sit ejusdem Calicis Consecratio?

Resp. plerisque Scholasticis opinari, quod si in Calice plus esset aquæ quam vini, nulla & irrita foret Consecratio. Auctor vero rei Sacramentariz lib. 4. c. 2. §. 3. ab his Theologis rationem desiderat, quæ hanc sententiam tueantur. Quamquam enim maxima fuerit congruentia, cur Ecclesiæ præceperit, modicissimam aquam cum vino misceri, quia vinum est materia essentialis sanguinis consecrandi, aqua vero ad essentiam sacramenti, & Sacrificii non pertinet, quippe quæ solummodo significat mysticam populi Fidelis cum Christo Capite conjunctionem, convenit autem, ut materia essentialis superet accessoriam; nullum tamen Ecclesiæ Decretum, nulla Majorum occurrit auctoritas, quæ ostendat, irritam fore consecrationem, si vinum aquam non superet. Equidem a Patribus Synodi Triburiensis superius laudatis, & a Summis Pontificibus Honorio III., & Pio V. quorundam est repressus abusus, qui contra rationabilem Ecclesiæ generalis consuetudinem plus aquæ quam vini in Calice infundebant, sed irritum propterea Sacramentum, ac Sacrificium fieri a nemine dictum.

Quod si aut rationem attendimus, aut Christi exemplum consideramus, nihil inde conficitur. Non ex ratione. Nam licet sit in Calice maior aquæ moles, quam vini, vinum nihilominus est, nec propterea deserit naturam suam, nec spiritus, ac robur deperdit. Quod si vinum est; valide ergo consecratur, quantumvis aqua præponderet. Non ex Christi exemplo, nam potius summa ejusdem sobrietas, Hebræorum consuetudo, conditio climatis, & vini, qui in eo nascitur, generositas summa, admonere videntur, non modicam aquæ quantitatem fuisse Calici intusam.

Hæc

Hæc sunt argumenta Auctoris laudati, ejus Doctrina si placeat, 7
cum ipso concludendum, quod licet in Calice plus aquæ, quam vini
reperiretur, peccaret quidem gravissime minister, qui consulto sit age-
ret, quippe qui contemneret Ecclesiæ auctoritatem, & praxim; si ta-
men vera retineretur vini natura, valida esset consecratio.

CAS. III. Qu. Tertio: In ejusmodi animi angustiis quid a Filiberto
agendum sit?

Resp. Attendendum esse quem excessum respiciant animi angustię, qui-
bus agitur Filibertas. Vel enim respiciunt excessum aquæ, quæ juxta
morem Ecclesiæ debet infundi, ut licita sit consecratio; vel respiciunt
excessum aquæ, cujus infusa quantitas juxta superius dicta reddit inva-
lidam consecrationem. Si primum debet acquiescere, ne obmurmuratio
illa, quæ ad hunc errorem corrigendum necessaria est, excitet in cir-
cumstantibus admirationem, & scandalum pariat. Nam licet hunc mo-
rem Ecclesiæ teneatur Sacerdos sub gravi servare, tamen post factum,
factum ipsum ratum habet Ecclesia, ne Sacrificii ordo, & aditantum
devotio perturbetur; quod etiam apparet in aliis ritibus, qui licet sub
gravi præcipiantur, si tamen ex inadvertentia fuerint aliquando varia-
ri, fert consuetudo, errores tollerari, ne erroribus aliis cum admi-
ratione corrigantur.

Si vero excessus aquæ, quo angitur Filibertas, reddat invalidam conse-
crationem, tunc procul dubio nova vini quantitas erit addenda, ne
Sacramentum, & Sacrificium in sua essentia vitiatur.

M E N S E A P R I L I.

CAS. I. S U N T, qui obmurmurant, ex quo Themistocles Confessarius
cum quibusdam spiritualibus sceminis ferme quotidie per
plures horas in Sede Confessionali immoratur, dum earum Sacras exci-
pit Confessiones; tum ad Eucharisticam Mensam ferme itidem quotidie
illas advoctat.

Qu. Primo: An ejusmodi obmurmuratio sit temeraria?

Cum nomine obmurmurationis veniat sermo in malum inclilians, & pro-
ximi charitatem offendens, ut innotescat, an hic sermo sit temerari-
us, animadvertere oportet, an innitatur sufficienti fundamento. Si
enim, qui in hunc modum obmurmurant, aliud motivum non ha-
beant, nisi quod videant Confessarium hunc, quotidie in Confessionali
sede commorantem, easdem feminas diutius detinentem, utique ob-
murmuratio hæc erit temeraria. Actio nempe de se bona est, & suapte
natura in bonum sensum facile interpretanda. Qui enim hoc vident,
opinari debent, Confessarium hunc animas natum, quæ spiritu Dei
aguntur, instruere ipsas in scientia Sanctorum, iter perfectionis osten-
dere, atque ad Orationem erudire. Neque refert, quod has præ cæte-
ris, & frequentius, & diutius detineat. Nam, ut egregie agebat San-
ctus Franciscus Salesius, sicuti lapidarii gemmas pretiosiores majori di-
ligentia expolienda aggrediuntur, majusque in iis tempus insumunt,
quam facere soleant in aliis lapidibus rudioribus; sic Dei ministri, si
animam prehenderint, tanquam pretiosam gemmam Dei templo fa-
cile inferendam, debent ipsam attentius limare, & diligentius custodire.
Si vero in hunc modum obmurmurantes hoc ideo faciant, quod vel vi-
deant

deant Confessarium in hac re tempus consumentem, deesse muneribus; quæ graviora sunt, & ad ipsum incumbunt; vel audiunt maritos, vel parentes conqueri, quod scemine huiusmodi Confessarii consiliis plus æquo indulgentes, dum in Ecclesia tempus infumunt, familiarum regimini non satis invigilant, sua deferunt officia, sunt aliis gravamini, atque, ut aliquando accidit, otium potius, quam pietatem sequentes de aliorum laboribus vivere fatagunt, cum esset laudabilius, quod ipsæ etiam operarentur consilio manuum suarum; tunc utique obmurmurationes huiusmodi suo fundamento non carerent, & nisi excederent in modo, non essent temerariæ.

CAS. II. Qu. Secundo: An Confessarius ratione aliqua imprudenter se gerat?

Resp. hujus quæsitæ solutionem ex hæcenus dictis facile derivari. Duplex enim differentia, in qua Confessarius, & poenitentes possunt reperiri, circumstantias designat, quibus attentis de Confessarii prudentia facile judicetur. Addi ramen generaliter potest, obmurmurationes huiusmodi aliquam in Confessario imprudentia sæpe indicare. Si enim in hisce mulieribus dirigendis, etiam quando & sunt sui juris, & ad veram pietatem inclinant, singularitates omnes declinaret, & illis ostendens semitam perfectionis, præ oculis perpetuo haberet, quod est præclare dictum a Divo Bonaventura, esse veram perfectionem, vulgaria quæque, & communia, quæ sui muneris sunt, perfecte servare, compelleret facile querimonias huiusmodi, nec veram devotionem contempnui exponeret, piasque illius consuetudines obnoxias faceret vulgi disteriis.

CAS. III. Qu. Tercio: An Eucharistica Communio, prout in casu, sit tam frequenter concedenda?

Resp. Communionis frequentiam, si circumstantiis casus accommodanda sit, facile posse determinari. Cum enim mulieres huiusmodi in duplici statu posuerimus, ex dictis clare colligitur, quibus concedenda sit tam frequens communio, quibus neganda. Si vero Confessarii generalis regula tradenda sit, magna statim proponitur controversia, cujus expositionem brevis hujus resolutionis non patitur. Ad hanc vero litem præcedendam, egregie pro more suo Benedictus XIV. in aureo Opere de Synodo Diocesana lib. 7. c. 12. legendum, servandumque proponit Decretum, quod jubente, atque approbante Innocentio XI. anno 1679. promulgatum est, cuius hæc verba transcribit: *In hoc igitur Pastorum diligentia potissimum invigilabit, non ut a frequenti, aut quotidiana sacra Communionis assumptione unica præcepti formula aliqui deterreantur, aut sumendi dies generaliter constituantur, sed magis quid singuli permittendum per se, aut Parochos, seu Confessarios sibi discernendum putet, illudque omnino provideat, ut nemo a Sacro Convivio, seu frequenter seu quotidie accesserit, repellatur; & nihilominus det operam, ut unusquisque digne pro devotionis, & præparationis modo rarius, aut crebrius Dominici Corporis suavitatem degustet: ... Proderit etiam præter Parochorum, & Confessoriorum diligentiam, opere quoque Continuatorum uti, & cum eis constitutum haberi, ut cum Fideles ad Sanctissimi Sacramenti frequentiam (quod facere debent) accenderint, statim de magna ad illud sumendum præparatione Orationem habeant; generatimque ostendant, eos, qui ad frequentiores, aut quotidianam salutiferi Cibi assumptionem devoto studio excitantur, debere, sive laici negotiores sint, sive conju-*

conjugati, siue quicumque alii, suam agnoscere infirmitatem, ut dignitate Sacramenti, ac divini iudicii formidine discant calestem Mensam, in qua Christus est, revereri, & si quando se minus paratos senserint, ab ea abstinere, sequae ad maiorem praeparationem accingere. Hæc itaque Confessarius attendat, quod cum fecerit, quod in Domino expedire videbitur, libere consulat, & exequatur, vanasque obrectatorum querelas, qui sibi non similes reprehendant, nihili faciat.

M E N S E M A J O.

CAS. I. **G**aleatius absque ulla Superiorum facultate libros in Indice vetitos, tum editos, tum manuscriptos legit.

Qu. Primo: Utrum graviter peccet?

Resp. Certissimum esse, Galeatium prohibitionis non ignarum, libros vetitos legentem in notabili quantitate, graviter peccare. Quoties enim habemus materiam gravem, advertentiam requisitam ad ælum humanum, & legem sub gravi prohibentem, habemus omnia, quæ suffiunt ad grave peccatum. Hæc autem omnia habentur in casu. Nam ad legem quod attinet, tot occurrunt summorum Pontificum Constitutiones; etque tam omnibus obviæ, ut eas hoc loco recensere superfluum videatur.

Quæ potius explicationem aliquam postulant hujusmodi sunt. 1. Quod veniat nomine libri 2. An detur in hac lectione parvitas materiz, & quibus limitibus coercenda. 3. Quæ ignorantia excuset a peccato. Ad quæ declaranda ad 1. dico esse, qui putent cum Sanchez, Layman, aliisque Concionem, Orationem, Epistolam, brevemque Disputationem libros non esse, adeo ut, si sequamur istorum opinionem, neque libri nomine debeat designari quæcumque scriptura, quæ decem foliis sit minor, cuius quidem opinionis hanc afferunt rationem; quod lex odiosa est, libertati humanæ contraria, atque adeo stricte interpretanda de iis solum scriptionibus, quæ proprie veniunt sub nomine libri. Verum opinio hæc nimis laxa videtur, tum quia nuncupatio libri ad errorem disseminandum non refert, quin potius quo scriptura est brevior, eo facilius propagatur, & legitur, atque adeo si virus contineat, facilius etiam legenti propinat; tum quia vel ipsæ thesæ juxta solum Curiz Romanæ libellorum nomine designantur, & Patrum loquendi ratio Sermones, Epistolas &c. libros appellat. Nec valet opposita ratio, nam potius lex hujusmodi favet fidei, & libertati a peccato, atque adeo stricte accipienda.

Ad alterum negant aliqui cum Ugolino dari in hac re parvitem materiz, sed ipsam alii communius admittunt, licet varient in ea definienda, cum alii ad lineas, alii ad paginam, alii ad folium ipsam extendunt. In hac varietate si quid juvat determinare, commodior erit determinatio illa, quæ non a lectione, sed potius a circumstantiis mensuram desumat, adeo ut attendi potissimum debeat legentis conditio, subversiva periculum, & qualitas materiz, quæ legitur.

Ad 3. respondeo, notitiam juris & scæti ad culpam requiri; esse autem diversimode attendendam, si loquamur de pena, de qua in sequenti casu disputabimus. Ignorantia enim omnino invincibilis excusat omnino a culpa, & pena; leviter culpabilis excusat a culpa gravi, & a

B

pena;

pœna; *crassa*, & *supina* excusat quidem a pœna, non autem a gravi culpa.

CAS. II. Qu. Secundo: Utrum aliquam censuram incurrat?

Resp. Attendenda esse super hac re Pontificum Constitutiones, quæ in regulis Indicis indicantur, ex quibus colligitur, legentes libros Hæreticorum, hæresim continentes, seu de Religione tractantes; libros Auctoris suspecti de hæresi, expurgatione indigentes, & nondum expurgatos; libros demum agentes de Astrologia, seu divinatione ex atris futurorum contingentium, & a libero arbitrio dependentium, incurrere excommunicationem, reservatam Pontifici. Præterea legendum est monitum, quod in sua Præfatione ad novam Indicis editionem præbet lectoribus in hæc verba Thomas Richinius: „Jam vero reticendum non putamus, quod non indumtaxat libri excommunicationis reservatæ pœna sunt proscripti, qui ab hæreticis compositi de Religione Catholica ex professo agunt, hæresesque docent, quod Litteris Apostolicis &c. statuitur, sed quod etiam fere omnes libri hujusmodi pœna proscribuntur, qui post prædictam Alexandri VII. Constitutionem editam die 5. Martii anni 1664. Brevibus, aut Bullis Pontificiis prohibiti indicantur, ut ex ipsis Brevibus Intelligi potest. „

Quod vero attinet ad alios libros præsto sunt verba, quæ habentur in regulis Indicis Sacrosanctæ Synodi Tridentinæ jussu editi in fine regulæ decimæ, quæ sunt hujusmodi: *Qui vero libros alio nomine interdictos legerit, præter peccati mortalis reatum, quo afficitur, judicio Episcoporum severe puniatur.* Ex quibus verbis colligitur, horum librorum lectioni nullam esse inflictam excommunicationem, nisi arbitrio Episcopi inflingeretur.

CAS. III. Qu. Tertio: Utrum Manuscripta cadant sub Indicis prohibitione?

Videretur dicendum, etiam Manuscripta generatim comprehendi sub Indicis prohibitione, cum id suadeat ratio, & auctoritas. Ratio inquam, nam etiam Manuscripta sunt libri; & priusquam ars Typographica esset inventa, libri hæreticorum calamo exarati, ut modo sunt, fuissent prohibiti. Auctoritas vero desumitur ex regulis Indicis. Nam regula 9. hæc habetur: „*Libri omnes, & scripta* Geomantiæ, Hydromantiæ &c. prorsus rejiciuntur. „ Pariter in regula 10. legitur: „*Eos vero, qui libellos manuscriptos vulgant, nisi ante examinati, probatique fuerint, eisdem pœnis subjici debere* judicarunt Patres deputati, quibus impressores, & qui eos habuerint, & legerint, nisi auctores prodiderint, pro auctoribus habentur. „ Tandem in fine ejusdem regulæ ita legitur: Quod si quis libros hæreticorum, vel cujusvis auctoris *scripta*, ob hæresim, vel ob falsi dogmatis suspicionem damnata, atque prohibita legerit, sive habuerit, statim in excommunicationis sententiam incurrat. „

At vero opposita ratio parum nos movet, cum eodem robore facile possit utrique parti favere. Sicut enim, qui dicunt, Manuscripta comprehendendi, utuntur hac ratione: *manuscripta sunt libri*: ita qui negant comprehendendi, utuntur hac alia: *manuscripta non sunt libri*; atque fortasse poterunt ipsam ex regulis, juris efficacius promovere. Nostra itaque resolutio tota erit ex auctoritate repetenda. Hujus autem vigorem si attente perpendimus, media quadam via incedendum videtur, adeo ut

ut non omnia Manuscripta comprehendantur, sed ea tantum, de quibus fit expressa commemoratio. Cum enim habeamus inter regulas juris, quod exceptio firmat regulam in contrarium, hoc ipso, quod non ubique, neque alicubi generatim in regulis Indicis de Manuscriptis sermo habeatur, dicendum videbitur, ea solum Manuscripta sub hac prohibitionem comprehendi, super quæ cadit exceptio, in reliquis vero contrariam regulam esse servandam. Quod vero Indicis regulæ nec ubique Manuscripta commemorent, nec alicubi generatim ipsa comprehendant, facile constabit, si quæ sunt exposita diligentius considerentur. Nam in regula 9. solum est sermo de scriptis Geomantia &c., in regula 10. solum est sermo de scriptis ob hæresim, vel falsi dogmatibus suspicionem prohibitis.

Neque valet, quod in iis verbis ejusdem regulæ 10. *Qui libros manuscriptorum vulgant &c.* nulla appareat exceptio: Exceptio enim, quæ non apparet in iis verbis, colligitur ex contextu sermonis. Ea quippe regula tota est, ut animadvertat in Impressores librorum, legesque statuatur, quibus subiacere debent, ne libros imprimant aut fidei, aut moribus noxios; quæ leges cum facile eludi possent, si ad evadendam hanc animadversionem Manuscripta adhiberentur ad hujusmodi divulgationem, fuit propterea sapientissime provisum, & cautum, ut Volgatores hujusmodi libellorum iisdem pænis subicerentur, ac Impressores. Quæ prudens provisio satis ostendit, etiam in hac parte suam exceptionem haberi.

MENSE JUNIO

CAS. I. **F**ridericus Parochialis Beneficii Patronus, cum ei sit in animo eligendi in novum Parochum quemdam Capellanum, consulit illius Plobanatus Archipresbyterum, qui de eodem Capellano talia revelat, ut Fridericus ab illo eligendo penitus amoveatur.

Qu. utrum teneatur Archipresbyter ad aliquam damni recompensationem?

Resp. Fridericum secreto inquitentem ab Archipresbytero idoneitatem Capellani a se eligendi, sui muneris partes explevisse. Communicant enim, ut inquit Tridentinum sess. 24. c. 1. alienis peccatis, & graviter peccant, qui non eligunt digniores, & quos magis utiles Ecclesiæ noverint: quæ de re Patronis incumbit eligendorum merita, nisi aliunde ea habeant satis perspecta, diligenti inquisitione perpendere, iisque perpendis non precibus, vel humano affectu, aut ambientium suggestionibus, sed eorum exigentibus meritis ad electionem venire. Si autem peccasset Fridericus inquisitionem omittens, peccasset etiam Archipresbyter non revelando inquirenti, quæ Capellanum reddebant indignum, aut minus idoneum, adeo abest, ut suapte natura ea revelando injuriam commiserit, atque ad restitutionem teneatur.

Dixi suapte natura, nam potuit Archipresbyter excedere in modo, vel manifestando falsa, vel crimina occulta sic revelando, ut injuste removeret suum Capellanum ab hac electione. Si excessit revelando falsa, tunc utique contra justitiam peccavit, atque ad restitutionem tenebatur. Nam licet Capellanus non haberet jus ad electionem, habebat tamen jus, ne iniquis artibus ab ipsa impeditur, quod impedimen-

tum cum habuerit ab Archipresbytero, passus est damnum, quod Archipresbyter arbitrio prudentum rescire debebit.

Si vero excessit, vera quidem revelando crimina, sed occulta, respondeo cum Lessio lib. 2. c. 12. disp. 18. vel ita revelavit, ut sequuta sit infamia apud plures, vel revelavit soli Collatori. Si priore modo, & illa infamia sit causa, cur Fridericus non conferat, alias collaturus, tenebitur restituere, quia per injuriam fuit damni causa. Si secundo modo, non tenebitur, quia quando agitur de officiis, & beneficiis, jus est ea patefacere, quæ hominem minus habilem, & collationem minus decoram efficiunt. Hac enim de causa sumi solent informationes occultæ. Ratio autem est, quia non est iniquum id patefacere, cujus ignoratio redderet involuntariam collationem, sed ignoratio horum criminum redderet involuntariam collationem, ergo per ipsam nulla committitur injustitia, nec ulla oritur obligatio restituendi.

CAS. II. Gabinus in iis reperitur circumstantiis, ut proximo, qui graviter detraxit, nequeat famam restituere, nisi saltem *leviter* mentiatur; dicendo scilicet, id, quod opposuit proximo, esse *falsum*, quamvis re ipsa *verum* sit.

Qu. Primo: Quid sentiendum in hac re?

Resp. certissimum esse, quodlibet vel leve mendacium esse ab intrinseco malum, & cum nulla ratione, in nulla circumstantia possit cohonestari, neque licitum erit ad restituendam famam proximi, graviter læsam. Adverto tamen, posse Gabinium famam proximi restituere adhibendo æquivocationem. Quamquam enim prohibitus sit usus restrictionis pure mentalis, gravi tamen interveniente causa, non est prohibita æquivocatio, quæ aut ex verbis, aut ex circumstantiis possit intelligi. Plures autem sunt modi, qui ab Auctoribus recensentur ad æquivocationem in re nostra licite usurpandam. Qui enim vera crimina manifestando, graviter detraxit proximo suo, potest dicere 1. cum Divo Thoma — Mihi credendum non est in eo, quod dixi, nam fatue, & perperam dixi. 2. cum Jo: Major. — Quando id dixi, verum putabam, sed adhibita diligentia inveni, me male, & stulte id affirmasse. 3. cum Medica — Cum tale crimen revelavi, non bene adverti, postea enim deprehendi, me fuisse deceptum. 4. cum Bannis — Nesciens quidquam mali de illo homine (nesciebat enim ad revelandum) ex passione dixi tale crimen. 5. cum Rebel — Erravi in hac re, mihi non credatis, (errant enim omnes, qui operantur malum, Prov. 14.) 6. cum eodem — Ignoranter locutus sum (omnis enim peccans est ignorans.) 7. cum Molin. — Quod dixi non credas, nam ex mea malicia id dixi.

At vero facile video, has loquendi rationes, utiles quidem futuras apud idiotas, & simplices, sed apud astutos, & doctos fortasse perniciosas. Nam cum noverint, retractari debere eum, qui proximum infamavit, si audiant adhibere hujusmodi tergiversationes, potius castiores fient de criminis veritate. Quapropter, ut apud istos, qui proximum infamavit, famam restituat, sunt qui putant, adhuc liberius dicere posse, se falsum dixisse, & vere protulisse mendacium, intelligendo scilicet de falso pratico, sicuti omnis adus, legi divinæ difformis, vocatur falsitas; & omnis voluntas recta, veritas appellatur. Revera enim etiam in Sacris Litteris peccatum passum appellatur mendacium, & opus bonum dicitur veritas. Sic pl. 4. ut quid diligitis vanitatem, & quæritis

men-

mendacium, id est peccatum. & Jo. 3. *Qui facit veritatem* [id est opera bona] *venit ad lucem.*

His itaque modis utatur Gabinus ad famæ restitutionem, quibus si videat, se uti non posse, nisi mendacii labem incurrat, non sibi putet licere mentiri.

CAS. III. Qn. Secondo: Utrum hic locum habeat effatum illud: *De duobus malis minus est eligendum?*

Resp. Quæstionem hæc defini non posse, nisi primum in casu exposito declaretur, ex duobus malis, quæ invicem comparantur, quodam dicendum sit *minus*, quodve *maius*, videatur. Vel enim in mendacio consideratur ratio vera mendacii, adeo ut necessarium omnino sit saltem leviter, sed vere mentiri ad famam proximi reparandam; vel mendacium assumitur, prout improprie cum æquivocatione confunditur, quæ in casu, cum ex verbis, aut circumstantiis detegi possit, omni potest peccato carere. Pariter cum disputatur de fama proximi, vel potest considerari actualis injusta læsio ejusdem fama, vel potest considerari damnum famæ jam amissæ. Hoc posito si quæstio hisce terminis proponatur: *licet ne vere mentiri saltem leviter ad famam proximi reparandam juxta illud effatum: de duobus malis minus est eligendum?*

Resp. negative; neque hoc effatum in quæstione proposita locum habet, nam mendacium est majus malum, quam malum impediendum per famæ reparationem. Est, inquam, majus malum mendacium, quam malum impediendum per famæ reparationem, cum, utpote intrinsece malum, sicuti fornicatio, ratione ulla coonestari non possit. Nec refert, malum quoque esse læsionem famæ injustam, nam in casu læsio famæ jam præcessit, & huic læsioni non comparatur mendacium, sed damno famæ jam amissæ. Quam ob rem dato etiam, quod esset minus malum injusta læsione famæ leve mendacium, tale non est in casu nostro; nam leve mendacium est malum culpe, damnum vero illud ex culpa tantum consequitur. Quod si mendacium intelligeretur nomine minoris mali, locum potius haberet effatum aliud, non sunt facienda mala, ut veniant bona, juxta illud Apostoli ad Rom. 3. 8. *non faciemus mala, ut veniant bona, quorum damnatio justa est.*

Quid vero dicendum, si sola æquivocatione possit obtineri amissæ famæ reparatio; & an in hoc casu dictum effatum locum habeat, satis, ut arbitror, ex superiori resolutione descendit. Cæterum generalius respondeo, juxta communem acceptionem, qua illud effatum a Theologis usurpatur, secundum ejus confessoria casum huic resolv non posse, Oporteret enim, quod inter mendacium, & famæ restitutionem esset alterutrum necessario eligendum, quod in re nostra verum non est, ut disputat Bossius Parte 2. tit. 1. §. 36. seq.

MENSE JULIO.

CAS. I. **P**arochus usque eo pro Majestate Domus Dei exardescit; ut totus in eo sit, quod ejus Ecclesia picturis, sculpturis, auro, pretiosisque Suppellectilibus exornetur; tantamque quotannis pro solemniori Festorum celebritate impensam agit, ut tandem parum ei superfit, quod det pauperibus.

Qn. utrum agat ejusmodi Parochus juxta Canonicas Sanctiones.

B 5

Resp.

Resp. negative. Nam licet Parochus Ecclesiae decus decentia omni, atque munditia debeat procurare, Sanctorumque memoria ea devotione recollere, quae animos Fidelium ad pietatem accendat; praeipue tamen de Pauperibus debet curam habere. Sancti (ut egregie Chrysostr. super Matth.) non gaudent, quando ex illis pecuniis honorantur, in quibus pauperes plorant. Consilans enim haec fuit a primis usque temporibus Ecclesiae sententia, & universalis Patrum Doctrina, cui perpetuo se conformarunt Pastores omnes, quorum memoria in benedictione transivit ad posteros. Novimus nempe, juxta hanc traditionem res Ecclesiae esse vota Fidelium, pretia peccatorum, & pauperum patrimonialia. Canonicae vero Sanctiones fuisse prosequitur Gibertus tract. 12. de bonis Ecclesiae. Genuensis in Man. c. 48. Franciscus Leo punct. 1. c. 15. Squillant. part. 1. c. 7., & alii passim, ad quos lectores remitto, cum superfluum videatur fusiori calamo prosequi, quae ubique sunt obvia.

Verum neque hac diligentia opus est Parocho, ut sui muneris partes facile agnoscat. Est enim opportune provisum in Synodo Diocesana, in qua lib. 3. c. 3. leguntur haec verba: *Ceterum superfluos Ecclesiae redditus in pios usus noverint expendendos: pupillorum, viduarum, egenorum necessitatibus quam fieri potest consilio; & elemosynis consulant, memores, Christum Dominum in Evangelio dixisse, quod uni ex minimis meis fecistis, mihi fecistis. Illudque Propheta: reformident: si: Pa: Pastoribus Israel, qui pascabant semetipsos, nonne greges a pastoribus pascuntur? Omnem avaritiae suspicionem supprimant, & quamvis ordine charitatis a natura propinquos amare doceamur, sit moderatus amor, non cura pro domesticis cumulandi.*

CAS. II. Albericus Parochialis Ecclesiae Oeconomus constanter renuit, quod Euphemia ejus Patrochiana ab alio Parocho in Matrimonium conjungatur; atque id *principaliter* negat, ob lucrum, quod amitteret nuptialium oblationem, si eidem Matrimonio *personaliter* ipse non adesset.

Qu. An obstinatus Alberici dissensus dici possit simoniacus?

Rosignolius contr. 8. de Sim. praev. 16. proponit hunc casum: An Parochus concedens facultatem alteri Sacerdoti assistendi Matrimonio, ea adjecta conditione, ut si eidem Delegato aliquid pretii & estimabile per Contrahentes conferatur, id ipsum, vel saltem illius partem teneatur sibi conferre, an, inquam, hic Parochus per hanc conditionem incurrat simoniam; atque hunc casum ita resolvit. Quod si illud exigatur tanquam pretium illius facultatis delegato concessae, utique committatur simonia, si vero illud sibi reservet tanquam extraordinarium emolumentum, quod ex gratuita Contrahentium donatione pro tali munere assilientiae quandoque confertur, non esset simonia. — Ex hac resolutione, pro qua citantur ab ipso Silvester, Suarez, & Ugolinius, facile apparet, obstinatum Alberici dissensum dici quidem posse simoniacum, si lucrum respiciat tanquam pretium assilientiae, secus vero si ipsum intendat vel ratione congruae sustentationis, vel ratione consuetudinis, quam in hac Diocesi introductam videmus.

At vero obitare facile poterit particula illa principaliter, quasi eadem attempta simoniaca labes vitari non possit. Nam Innocentius XI. cum num. 45. damnasset asserentes, non esse simoniam dare temporale pro spirituali, quando temporale non datur tanquam pretium &c., n. 46. hanc quoque sententiam proseripsit. — *Ex id quoque locum habet, etiam si*

tem-

temporale sit principale motivum dandi spirituale, imo etiam si sit finis ipsius rei spiritualis, sic ut illud pluri assimetur, quam res spiritualis. Ex qua proseriptione sit possumus argumentari: Cum temporale est principale motivum dandi spirituale, committitur simonia; ergo etiam committitur, cum temporale est principale motivum negandi spirituale, ut in casu nostro contingit, nam Albericus principaliter negat assensum, ne lucrum amittat.

Verum respondeo, damnatam propositionem nobis non adversari; Licet enim Albericus principaliter intendat lucrum, non ipsum tamen intendit ut pretium assistentiæ, sed, ut vidimus, ut ratione congruæ sustentationis, vel ratione consuetudinis, quæ quidem intentio non est simoniata. Sic v. g. qui dat stipendium pro Missa principaliter intendit Missam, nec tamen hæc intentio est simoniaca, quia Missam non intendit ut pretium stipendii, sed in ipso stipendio sibi tantum proponit sustentationem Ministri. Porro in damnata propositione licet habeantur ea verba *temporale motivum*, tamen ut adnotant Viva in dic. prop. & Salm. 1. 2. periode est ac si diceretur *temporale pretium*. Quando enim dantur res spirituales principaliter propter rem temporalem, non dantur omnino gratis; sed practice dantur enim aliquo pacto implicito imponendi alteri novam obligationem, atque ita motivum in pretium convertitur. Quapropter, qui ex ipsa propositione vellet contra nos argumentari, deberet ita procedere. — Cum temporale est principale pretium rei spiritualis, committitur simonia; ergo a pari cum lucrum temporale habetur ut pretium assistentiæ, cuius facultas principaliter negatur, ne hoc lucrum tanquam ejus pretium amittatur, committitur simonia. In hoc enim argumento vera utique esset consequentia; at nemo non videt, quam diversa sit nostra ratiocinatio, quæ in hoc tantum resolvitur, ut liceat Alberico ratione propriæ sustentationis, atque ad servandam consuetudinem sibi favorem pro nuptialibus hisce oblationibus cum alio contendere, quod omnes concedunt.

CAS. III. Magna est concertatio inter Parochum, & Capellanum, utrum Mulier uxorata, seu Vidua, vivente ejus Patre, adhuc remaneat sub ejusdem Patris potestate.

Qu. Quid juris in hac re?

Resp. Patriam potestatem definiri a Rosignolio c. 2. n. 3. *Jus radicaliter a natura insitum, & per jura civilia modificatum, quod habet Pater in Filios, eorumque bona ex vi legitime generationis.* Patria enim potestas vel potest considerari relate ad aliqua munera, & obsequia naturalia, quæ scilicet natura ipsa ex vi naturalis generationis omnibus indidit; vel potest considerari in ordine ad aliqua specialia munera, quæ per jus civile fuerunt specialiter inducta. Hæc posita distinctione ad propositam questionem respondeo, attentis iis, quæ in jure naturali radicem habent, certissimum esse, Uxoratam & viduam, Patre adhuc vivente, sub ejus potestate remanere; attentis vero iis, quæ a jure civili proficiuntur, attendendum esse, quid jura ipsa disponant. Id porro inquirentes sustinent communius Doctores, attento jure communi filiam transuentem ad nuptias a Patria potestate non eximi, quamquam non negent, quod si alicubi vigeant jura municipalia, ipsas eximentia, hæc debeant suum effectum habere, sicuti effectum habent apud Hispanos, & Gallos, ubi vigent hæc jura, ut Sanchez testatur.

Quod autem jus commune ita disponat, ostenditur, 1. ex generali extensione Patriæ potestatis, in qua etiam Filiæ uxoratæ comprehenduntur; §. enim *qui igitur 3. insit. de Patria potestate de Masculis*, & Feminis, nulla exceptione facta, generatim fit mentio, legitur enim. *Qui igitur ex te, & uxore tua nascitur, in tua potestate est. Item qui ex Filio tuo, & uxore ejus nascitur, idest nepos tuus, & nuptis aque in tua sunt potestate, & Pronepes, & Pronepis, & deinceps ceteri*. Ostenditur 2. ex peculiari dispositione, qua de uxoris hæc sermo; & expresse deducitur ex *l. si uxorem, c. de condit. inser.*, ubi relictum alterius uxori, quæ tempore nuptiarum fuerit sub Patria potestate, acquiritur ejus Patri, secus si tempore earundem nuptiarum fuerint a Patre emancipata, quod signum evidens est, ratione nuptiarum non amitti potestatem Patris in Filiam, quia secus legatum hoc non pertineret ad Patrem.

Obstare tamen videtur Apostoli auctoritas, qui ad Cor. 7. inquit: *Mulier sui corporis potestatem non habet, sed vir. Et rursus Præcipio non ego, sed Dominus, uxorem a viro non discedere*. Verum respondeo cum Roginello laudato capite n. 18., hujusmodi verba non ferire patriam potestatem, sed tantum referri ad obsequia Matrimonialia; ceteroquin nec Masculi nubentes subicerentur patriæ potestati, cum ipsi quoque subdantur potestati uxoris, asserente eodem Apostolo: *similiter autem & vir sui corporis potestatem non habet, sed mulier*. Quod igitur Mulier potestati viri subdatur, est solum intelligendum quoad debitum carnis, & alia munera Matrimonialia, quæ patriæ potestate turbari non debent. Si enim, ut notat Glossa, non velis turbare matrimonium, sed patriam potestatem modice exercere, non obstat ei hæc exceptio, sed agere poterit cum effectu.

Hæc porro, quæ diximus de Uxorata, præbent etiam de Vidua. Si enim per nuptias, quamquam fiat subdita viro, non eximitur Mulier a patriæ potestate, multo minus eximi poterit, cum illo defuncto, ab ejus subjectione liberatur.

MENSE AUGUSTO.

CAS. I. **C**ompleta decennali cujusdam fundi locatione, Conductor repetit a Titio ejusdem fundi Domino omnes impensas, quas ipse egit, quibus scilicet fundum ipsum & Aedificiis, & Plantationibus meliorem fecit, & reddidit amariorem. Titius vero firmiter negat earundem impensarum refectionem, cum illas Conductor egerit *se penitus inconsulto*.

Qu. Pro qua parte pugnet ratio?

Resp. rationem pugnare pro Conductore, si tamen intelligatur cum debitis exceptionibus. Docent enim communiter Doctores, Locatorem obligari ad refundendas expensas, tam necessarias, quam utiles a Conductore in rem locatam factas, & duraturas etiam post finitam locationem. Probant autem textu clarissimo in *l. Dominus §. 1. ff. hoc titulo 16. Si in conducto fundo Conductor sua opera aliquid necessario, vel utiliter auxerit, vel edificaverit, & insinuerit, cum id non convenerisset ad recipienda ea, quæ impendit, ex conducto cum Domino fundi experiri potest*. Addunt vero rationem, quia illa melioramenta, sine

necef-

necessaria sint, siue dumtaxat utilia, quando interviunt vel in perpetuum, vel ultra tempus conductionis, cedunt in utilitatem rei locatae, & Locantis, ergo per eundem sunt compensandae. Tenet consequentia, quia nemo tenetur propriis expensis rem meliorem facere, nec de alieno commodo incommodum reportare, sed potius, ut habemus in regulis juris §. in 6. *qui sentit commodum, par est, ut sentiat onus.*

Non refert autem, quod Conductor, ut habetur in casu, Domino inconsulto, fecerit huiusmodi expensas. Jura enim, ut vidimus, cum dant Conductori actionem in Dominum ad repetendas expensas, solum loquuntur de qualitate expensarum, neque requirunt praevidiam Domini approbationem, quae quidem si praecessisset alio etiam titulo teneretur, nec ulla esset difficultas. Praeterea censendus est Dominus semper velle, & optare sui fundi meliorationem, quam propterea procurans Conductor, illius voluntatem suo jure praesumit. 3. Id ipsum exposcit locationis natura. Locatio enim, & conductio est unus idemque contractus in utilitatem, & commodum utriusque Contrahentis institutus, & sicuti teneretur Conductor ad damni satisfactionem, si domos, & vineas antea plantatas destrueret, ita potest exigere expensas, si novas aedificet, & plantet.

Dixi autem adductam rationem cum debitis exceptionibus esse intelligentiam. Primo enim, cum casus loquatur de expensis, quae fundum reddunt & meliorem, & ameniorem, distinguere oportet. Vel enim eadem expensae faciunt fundum meliorem simul, & ameniorem; vel aliae meliorem faciunt, aliae ameniorem. Si primum valebit a fortiori exposita ratio. Si secundum, cum huiusmodi expensae sint potius voluptuosae quam utiles, non erunt ex iis, quas Dominus reficere teneatur, ut passim Doctores.

Praeterea animadvertere oportet, quod huiusmodi expensae excedentes non sint, & Domino admodum graves, quia in huiusmodi gravibus expensis in melioramentis non necessariis, sed tantum utilibus, non praesumitur voluntas Domini, sed potius dissensus; nam graves expensas, & modum excedentes consultuisset Dominus ipse, aut fecisset de suo, si easdem voluisset. Quamquam vero in hac circumstantia non tenetur Dominus incommodum subire, ut satisfaciatur, tenetur tamen satisfacere, qua parte commodum sentit, ut esset vel locationem prorogando, donec Conductor indemnis evaserit, vel tandem in eum refundendo illud incrementum pensionis, quod propter illius expensas reportaverit ex alia locatione. Quod si, quae melioravit Conductor, sine praejudicio fundi possit asportare, libere poterit. Ita Reb. alique passim.

CAS. II. Aristides Filiusfamilias nonnullos invenit deperditae conscientiae homines, qui, iniquissimo pacto senore, mutuant et ingentes pecuniae summas, & quidem, ut vivat luxuriosius.

Qu. Primo: Num Aristides, defuncto Patre, juxta jus civile ejusmodi debita persolvere teneatur?

Resp. negative, nam Filiusfamilias beneficio legis a solutione hujus debiti solvitur etiam post mortem Patris, licet ipsum contraxerit post annum vigesimum quintum; atque id locum habet non solum pro foro externo, sed etiam in foro conscientiae; imo licet renunciaverit ejusdem legis beneficio, & juramento se adstrinxerit ad solvendum, non

pro-

propterea tenebitur, quæ omnia ex ordine declarantur. Principio enim, quod beneficio legis ab hac solutione solvatur clarissime insertur ex Senatus Consulto Macedoniano, quo cautum est, ut Filiisfamilias ex mutuo accepto efficaciter conveniri non possit, sed perpetua exceptione Senatus Consulti tutus sit non solum ipse, sed etiam Pater, si petulium Filii possideat, imo etiam Fidejussores, nisi donandi animo intercesserint, ut inter ceteros videre est apud Layman *lib. 3. de just. tract. 4. c. 25.*

Quod vero ab hoc debito liberetur etiam Patris morte secuta, descendit ex sine ejusdem Senatus Consulti. Hoc enim jus, ut adnotat Rosignolius *cont. 3. de mutuo pran. 4.* non solum inductum est in potestatem mutuantium, sed etiam in favorem Parentum, quorum indemnitati voluit Senatus consulere, ne Filii, ut ære alieno se citius liberarent, animum caperent conspirandi contra Parentes. Sed hæc occasio oritur ex ipsa celebratione contractus, quo tempore Parentes supponuntur vivere. Ergo hoc jus ipsam obligationem in initio supponitur extinguere. Obligatio autem semel extincta non amplius reviviscit.

3. Eadem ratione id ipsum ostenditur, licet Filii vigesimum quintum annum exceßerint: nam per hoc occasio non tollitur, qua possint mortem Parentibus intentare.

4. Id verum est etiam in foro conscientie; nam lex hujusmodi publica auctoritate inducta est, atque justa. Lex autem justa non solum in foro externo obligat, sed etiam in interno. Intellige tamen, si pecunia credita consumpta sit, & inde Filius locupletior non sit factus, nam tunc tenebitur alia ratione, ut observat Layman loco citato. Certum enim est, quod lex civilis potuerit tum in odium, & pœnam feneratorum, tum etiam ob Reipublicæ commodum ita statuere, ut tam extra judicium, quam in judicio, scilicet in utroque foro, exceptio Creditoribus opponi queat ad Filiisfamilias liberationem.

5. Quod solvere non teneatur, licet beneficio legis renunciaverit ex dictis descendit. Hoc enim Senatus Consultum non solum est conditum in favorem Filiorum, sed multo magis in favorem Parentum, ne scilicet eorum mors ob restitutionem talis mutui a Filiis intentetur. Nemo autem renunciare potest privilegio, quod in aliorum favorem, & in odium delinquentium inductum est, ut habet Lugo *Tom. 2. disp. 25. sect. 1.*

Restat ultimum, quod neque teneatur posito juramento; qua in re adversantes habemus Lessium, Covarruviam, aliosque, quorum ea est ratio, quod juramentum factum in alterius favorem servandum, sit quando absque peccato servari potest, sicut in casu servari posse contendunt. Nihilominus dico ex iis, quæ diximus, etiam ostendi, Filiisfamilias non teneri ad restituendum, licet juraverit. Quilibet enim Filiisfamilias ad facilius obtinendum mutuum posset in fraudem legis juramentum interponere, atque ita semper haberetur periculum integrandi mortem Parentibus, pro quo periculo de medio tollendo Senatus Consultum divulgatum est. Præterea hoc Senatus Consultum vim habet etiam in foro conscientie; adeoque, ipso stante, juramentum non solum est contra leges civiles, sed etiam contra bonos mores, contra bonum commune, & contra jus, quod habent Parentes per talem legem acquisitum, atque adeo sine peccato servari non potest: qua posita animadversione corrumpit ratio, quæ in oppositum astrebatur. Ita cum Ferrar.

v. Mutuum, citato Pánormitano, Innocentio, & aliis.

CAS. III. Qu. Secundo : An ad id teneatur jure naturæ.

Respondeo absolute loquendo, Aristidem teneri jure naturæ ad hæc debita perfolvenda ; cautum tamen esse jure positivo, ut non solvens non faciat contra jus naturæ. Quamquam enim jus positivum, juri naturali præjudicare non possit, ipsum in aliquo derogando, potest tamen apponere circumstantiam ex parte objecti, qua posita desinat esse de jure naturali, quod tale foret ea circumstantia seclusa. Manifestum hoc est in lege præscriptionis. Fit enim hac lege, ut qui bona fide possedit aliquid alienum toto tempore dato ad præscribendum, eo tempore elapso, possit illud retinere, licet resciat esse alienum, quod tamen, seclusa lege præscriptionis, esset contra jus naturale. Sic in re nostra, attento jure naturæ, quod in aliis contractibus servari videmus, deberet Aristides hæc debita solvere ; accedit Senatus Consultum Macedonianum, lege interposita ostendens, in hac circumstantia solutionem hujusmodi ad jus naturale non pertinere, cum revera non sit de jure naturæ fornicatorum vitia tueri, & vitam Parentum periculo exponere ; atque adeo ab hac solutione hujus legis vigore deobligatur.

Quod porro Aristides de jure naturæ ad hæc debita perfolvenda teneatur, ex ipso Senatus Consulto duplici ex capite ostenditur. I. Enim si Filius familias solvat ejusmodi debitum, aut ejus loco vel Fidejussor, vel Pater, solutio est valida, neque ita solutum repeti potest. Ratio autem est, quoniam revera erat debitum, esto dum exigebatur locum haberet exceptio. Quomodo vero erat debitum, nisi quatenus obstringebatur ab ipso jure naturæ.

Præterea, quod Senatus Consultum solam apposuerit circumstantiam, qua posita ostenderetur, solutionem hanc de jure naturæ amplius non esse, facile patet ex exceptionibus variis, quas patitur hoc Senatus Consultum, ex quibus cognoscitur, quod si casus ponatur extra hanc circumstantiam, statim reviviscit jus naturale. Octo enim sunt casus, in quibus hæc lex locum non habet. 1. Si Filius familias pecuniam accipiens habeat peculium castrense, vel quasi castrense. 2. Si fuerit miles. 3. Si publice videatur sui juris. 4. Si pro altero sui juris fidejussor, nisi id fecerit in fraudem. 5. Si mutuum acceperit jubente Patre, aut consentiente. 6. Si fuerit ipsi pecunia credita, dum legationis, aut studiorum causa alibi degeret. 7. Si pecuniam vertit in bonum Patris. 8. Denique si fuerit a Patre negotiationi præpositus, quia ipsi præsumeretur mutuandi facultas concessa. In quibus limitationibus cum in integrum restituitur solvendi obligatio, satis declaratur, absolute loquendo vigere adhuc jus naturale. Vid. Mol. tract. 1. disp. 4.

M E N S E S E P T E M B R I.

CAS. I. **T**iberius petit ab Alcibiade ejus Primogenitam in uxorem ; Veruntamen cum Alcibiades probe sciat, Tiberinum in rebus suis esse hominem inconstantissimum, eidem Primogenitam suam promittit in Sponsam, adjecta tamen, & ab ipso Tiberio acceptata conditione per modum pœnæ, ut si absque ulla rationabili causa a Sponsalibus resiliat, 100. aureos in pœnam vel sibi, vel Sponsæ ipse perfolvere

vere teneatur. Contigit autem, sicut in ceteris, de promissis Sponsalibus Tiberium poenitere.

Qu. Primo : Utrum a promissis Sponsalibus *irrationabiliter* resiliendo Tiberius peccet graviter ?

Resp. Doctores omnes communiter tradere, Sponsalia obligare sub culpa lethali, si Gratianum excipias, & Abbatem Panormitanum, qui oppositum probabile existimant. Est autem clarissima ratio, Sponsalia per se loquendo sub mortali obligare ad promissionem implendam, cum ex mutuo contractu, & oneroso, si materia sit gravis, gravis quoque nascatur obligatio iustitiæ. Sunt autem Sponsalia contractus mutui, & onerosus inter Sponsam, & Sponsam, & materia est gravis. Nascitur ergo ex Sponsalibus obligatio gravis, & sub mortali, a qua, qui reedit gravem affert injuriam alteri Sponso, & graviter peccat. Nec obest, quod l. 1. C. de Spons. habeatur, quod *alii desponsata renunciare conditioni, & alteri nubere non prohibetur*. Hanc enim sententiam per Canones correctam esse, auctor est Sanchez lib. 1. de Spons. disp. 25. Tiberius ergo a Sponsalibus irrationabiliter resiliens graviter peccat.

CAS. II. Qu. Secundo : utrum in casu appositam poenam ipse persolvere teneatur ?

Resp. magnam esse super hac re Auctorum concertationem, quorum pars maxima teneri negat, maxima affirmat. Sed quoniam, qui negant vix ullum afferunt rationis momentum, & solis innituntur juribus, quæ indiscriminatim conventiones hujusmodi & prohibent fieri, & irritant factas, ne matrimonii libertas lædatur, quin peculiariter verbum faciunt de injuste resiliens ; quin vero affirmant, & habent potiora momenta rationum, & resolutionem restringunt ad eam circumstantiam, in qua quis injuste resiliat ; videtur propterea *juxta horum sententiam* rationes, & jura commodius attemperari. Quapropter cum illis affirmo, teneri Tiberium in casu exposito poenam persolvere.

Probo autem, quia in primis hujusmodi poenæ impositio *non* juri naturali, nec bonis moribus adversatur, cum potius ad id inducat, quod honestum est, & debitum ex iustitia. Deinde impositio hæc matrimonii libertatem non tollit. Hæc enim libertas ad injusta, & peccaminosa non est, sed ad justa, & rationabilia. Supposita autem obligatione per sponsalia contracta, injustum esset ab eadem recedere sine causa legitima ; atque ita non est libertas ad recedendum, cum nulla sit ad peccandum libertas. Id ipsum confirmat praxis Ecclesiæ, quæ injuste resiliens a sponsalibus gravissimis poenis, & censuris impellit ad contrahendum Matrimonium. Si autem metus poenarum hujusmodi Matrimonii libertatem non tollit, neque ipsam tollit metus poenæ pecuniariæ pro injuste resiliens in celebratione contractus appositæ, utraque enim poena gravis est, & apta movere. Neque obest, quod *una* apponatur per Ecclesiam, altera vero privata auctoritate, nam absolute verum non est, quod privata auctoritate non possit incuti metus, quando mutuo consensu objectum talis metus ex iusta causa inducitur, ut evenit, quando incutitur contra resiliens injuste ; quod est conforme cum juri naturali, tum positivo.

Opponunt vero oppositæ sententiæ Patrocinatores, jura interdictentia hujusmodi poenæ appositionem, loqui distincta, & indefinite etiam pro injuste resiliens esse accipienda. Huic tamen objectioni est obvia respon-

responsio, quia jura citata, quamvis indistincte loquantur, secundum modum significandi, secundum subjectam materiam, & secundum rationem formalem motivam, ob quam condita sunt, sunt restringenda. Cum igitur jura illa conventionem poenalem proferibentia, eo unice tendant, ut auferant violationem libertatis injustam, non autem voluntatis determinationem constitutam per consensum proprium, & liberum eorumdem Contrahentium; hinc est, quod dicitur taxat restringi debeant contra poenam efficientem iuste resilientem, non vero contra poenam adversus resilientem injuste.

Id clarius ostendit Giribaldus *Tracl. 10. ad Mat. c. 1. dub. 10.*, quia c. *Gemma*, in quo damnatur, & irritatur poena posita in contractu sponsalium agebatur de sponsalibus inter impuberes celebratis, qui iuste possunt cum ad pubertatem pervenerint resilire, & sic videtur, irritationem poenae tunc solum valere, cum adest iusta, & rationalis causa recedendi. Videtur ergo, teneri Tiberium ad poenam appositam perfolvendam, quod fute probant Suarez, Vasquez, Coninchius, Layman, Pontius, & alii a Giribaldo citati.

CAS. III. Pomponius, Sponsalibus cum Berta valide contractis, alia postmodum Sponsalia contrahit cum Maria, interveniente juramento, & carnali copula in maiorem spem futuri matrimonii.

Qn. Utrum Pomponius debeat stare primis Sponsalibus, vel secundis?

Resp. Spectato rigore iustitiae debere Pomponium stare primis sponsalibus.

Stante enim validitate priorum sponsalium, posteriora sponsalia fuerunt invalida, & cum fuerint inique contracta, neque poterunt juramento convalidari, quia juramentum non est vinculum iniquitatis. Major difficultas posset esse de copula, adeo ut Pomponius, saltem tanquam deflorator, liber evadat ab obligatione priorum sponsaliorum, ut alteri promissit equum, & postea accepto, consumptoque pretio alteri vendidit, teneret huic tradere. Pariter, qui virginem defloravit in spem futuri Matrimonii, teneret eam ducere, licet antea emisisset votum castitatis, vel religionis. Sicuti ergo tradito alteri equo cessat obligatio promissionis alteri factae, & virginis defloratae, votum non obstat, quo minus eam ducere debeat; ita in re nostra obstat non potuerunt prior sponsalia, ne alteram ducat. Denique cum duo simul agunt, alter de lucro acquirendo, alter de damno vitando, huic non illi favendum est. Agit vero in casu nostro prima sponsa de lucro acquirendo, agit secunda de damno vitando, ergo huic potius favere debemus.

Verum respondeo, promissionem factam secundae sponsae semper esse nullam, utpote de re illicita, cum fuerit primae sponsae promissa, neque injuriam alteri illatam jus adimere a prima acquisitum, praesertim cum damnum hoc alia ratione possit compensari, ad quam utrique compensationem Pomponius tenebitur. Non valent autem rationes adductae, nam in promissione, & venditione equi duae obligationes concurrunt, quae diversi sunt generis, cum in promissione oriatur obligatio ex fideiitate, in traditione oriatur ex iustitia. Obligatio autem, quae oritur ex iustitia debet prevalere. Pariter qui Virginem defloravit cum spe matrimonii, debet ducere, quia obligatio voti a virtute religionis proficiscitur, quae minus obligat, quam iustitia, unde nascitur obligatio ducendi Virginem hac promissione defloratam. Deinde prius votum non omnino aufertur per matrimonium, sed suspenditur; at in nostro casu

casu prior obligatio prorsus extinguitur. Tandem quia Deus non ita exacte promissionem sibi factam solvi petit, ut homines, neque enim impleri vult cum damno tertii. Homines vero propter injuriam alteri illatam, privati nolunt suo jure. Hinc ad ultimum est lata disparitas; non enim agimus de contractu lucrativo, sed oneroso, cum fuerit ex utraque parte obligatorius; unde potius valet axioma alterum, quod prior in tempore est potior in jure. Dicendum est ergo, debere Pomponium stare primis sponsalibus.

Addidi tamen, hoc verum esse spectato rigore iustitiae; nam prima sponsa teneretur ex charitate cedere juri suo, si altera ex desolatione grave damnum pateretur, cum charitas obliget ad leve noxamentum patiendum, ne proximus gravissimum subeat. Stant pro hac parte Sanch. Henriq. Lop. Ronc. aliique. Stant contra nos Palaus, Viva, Pontius Diana, Girib. Salmat. &c.

M E N S E O C T O B R I.

CAS. I. **T**heophanes a Tiberio rogatus, ut ei 1000. aureos mutuer, libenter annuit; eique *gratis omnino* pecuniam credit; verum in enumerando pecuniam fidenter sperat, ut ex ejusmodi mutuo aliquid lucri sibi possit obvenire.

Qu. Utrum Theophanes propter hujusmodi spem peccet peccato usurae; cum Christus Dominus dixerit *Luc. 6. 35. mutuum date nihil inde sperantes.*

Si Sotum audimus *lib. 6. de Just. q. 1. art. 1. licet* Theophanes hac ratione mutuando non se conformaret Christi Domini verbis *mutuum date nihil inde sperantes*, non propterea graviter peccaverit; cum ipse putet, verbis hujusmodi non praeceptum, sed consilium contineri, quatenus sensus sit, ut bene faciamus proximo, eique mutuum demus, abique intuitu humanae mercedis, ut *divina merces recipiatur*; nam per ipsum usurae prohibitio directe continetur in eo praecepto *non furaberis*. Communis tamen sententia vult, usuram prohiberi etiam in eo loco Evangelico, quatenus ea verba partim consilium contineant, ubi dicitur *mutuum date*, partim vero praeceptum, ubi additur *nihil inde sperantes*; ita ut absolute loquendo non teneamur mutuare; mutuantes vero semper teneamur nec lucrum sperare. Nam Urbanus III.; Alexander III.; Leo X., reprobantes lucrum ex mutuo, ea Christi verba solent asserre; quod etiam facit Div. Thom. Covar. Bann. Nav. Rebel. Lef. & passim Docti.

Hac posita explicatione, ut omittam varias opiniones, quibus questionem hanc, difficilem utique, atque perutilem declarandam aggrediuntur Cajetanus, Sotus, Contradus, Medina, Navarrus aliique, respondeo cum Tolet. *Libr. 5. sum. c. 21.* distingui oportere inter habere spem, & habere intentionem: nam aliud est sperare, seu desiderare rem, aliud ipsam intendere. Intentio enim non solum dicit velle rem, sed etiam dicit finem operationis, ut propter illam rem homo operetur. Spes autem, & desiderium solum dicunt simpliciter velle. Hoc posito dicit, quod habere spem, aut desiderium habendi aliquid ultra sortem, non facit mutuantem usurarium; bene vero habere intentionem. Cum ergo Theophanes, licet fidenter speret lucrum obventurum ex mutuo, ta-

men

men lucrum ipsum non intendat, ut finem mutui, non erit usurarius. Quod vero lucrum sic speret, ut ipsum non intendat tamquam operis finem, ex ipsa causae expositionem colligitur. Erat enim mutuaturus, de hac spe ne cogitans quidem; spe vero accedente primam intentionem non mutavit; unde nihil admisit contra illa verba *mutuum date nihil inde sperantes*.

CAS. II. Eusebius mutuatur pariter 1000. aureos Titio cum hac *principaliter* intentione, ut illius benevolentiam, & amicitiam assequatur.

Qu. Num ejusmodi Eusebii intentio usurae labe infecta sit.

Resp. Ex communi sententia usuram non esse intendere in mutuo etiam *principaliter* benevolentiam, & amicitiam mutuatarum, quia benevolentia & amicitia ratione sui non sunt pretio aestimabiles, neque, ut inquit Angelicus, pecunia commensurantur. An autem usura sit dicere, mutuo tibi pecuniam cum pacto, ut sis mihi benevolus, negat Soto, quia amicitia & benevolentia ita sunt effectus animi liberi & voluntarii, ut nullo modo cadant sub debito, vel obligatione civili. Rectius vero Molina in hoc mutuo usuram agnoscit, quia in hoc casu ex obligatione antidotali fieret obligatio civilis, quae est lucrum pecunia aestimabile. Eandem opinionem tenet Giribaldus de mutuo, & usura 2. 36. & alii apud ipsum.

Dixi benevolentiam, & amicitiam ratione sui non esse pretio aestimabiles; possunt enim considerari non solum ratione sui, sed etiam ratione effectuum, qui possunt inde prodire, qui quidem effectus cum possint verum lucrum asserere, aliam pariunt difficultatem. Potest enim Eusebius principaliter sistere in sola amicitia Titii, & potest ulterius intendere effectus, qui ab hac amicitia essent ipsi obventuri. Si 1. responsio jam patet. Si 2. potest rursus inquiri, an haec intentio sit usuraria.

Resp. autem eadem ratione. Si enim Eusebius amicitiam intendat, & commoda ab ipsa obventura, ita quidem, ut non deducat in pactum, sed speret ex sola amicitia, non est usurarius. Si autem non solum intendat tamquam sponte ab amicitia profectura, sed etiam in pactum deducat huiusmodi commoda, tunc erit usurarius.

Atinques; conferre spirituale cum intentione acquirendi temporale, etiam ex gratitudine, ex motu. Pii V. est simonia. Cum ergo sit usura in temporalibus, ut est simonia in spiritualibus, erit usurarius, qui lucrum intendit ab amicitia, etiam obventurum ex sola gratitudine. Ad hoc vero respondeo, in hac re non valere paritatem adductam. Ideo enim primum, non quia malum suapte natura, sed quia prohibitum; unde non sequitur de usura, nisi Pontifex tale mutuum prohibeat, quod factum non est.

CAS. III. Erasistes summis precibus exoratus mutuatur Cajo 10. aureos, sed cum hac intentione, & pacto, ut cum de sua apotheca iniuste male dixerit, ipse ad illam in posterum, emptionis causa, adire quandoque teneatur.

Qu. An ejusmodi pactum sit usurarium?

Resp. duplici intentione posse Erasistem convenire cum Cajo de sua Apotheca, in gratiam mutui identidem frequentanda. Potest enim 1. lucrum intendere, quod ex hac frequentatione facile reportabit; potest 2. unice intendere restitutionem famae, malis artibus Caji iniuste laesae. Si primum intendat, communis est Doctorum sententia, pactum hoc esse

usu-

usurarium. Conventio enim, ut inquit Giribaldus *de mut. & uf. n.* 33., & pactum quodcumque, per quod mutuatario imponitur onus, & obligatio ex iustitia aliquid præstandi, ad quod alias non tenebarur, usurarium est, & illicitum. Ratio est, quia usura est lucrum immediate proveniens ex mutuo, idest ex pacto, & obligatione unice contracta ratione mutui, tamquam ejus pretium, & ut debitum ex iustitia, non quia vere debeatur ex iustitia, sed quia exigitur tanquam si esset debitum ex iustitia, & titulo oneroso, & pacto ipsorum contrahentium, ergo lucrum, & commodum quodcumque pretio æstimabile tali pacto collatum est usurarium. Cum itaque Cajus liber omnino sit, ut Apothecam adeat, quæ sibi placuerit, non poterit sine ulura hac liberrate spoliari, & cogi ratione mutui ad Eraniſtis Apothecam adeundam.

Si vero Eraniſtes non lucrum intendat, sed famæ restitutionem, distinguere rursus oportet: Vel enim hæc famæ potest alia via reintegrari, vel una superest via si adeat identidem ipſius Apothecam. Si primum, respondeo, adhuc pactum hoc esse usurarium, & quidem ob eandem rationem. Nam licet Cajus ex iustitia teneatur ad restituendam famam malis artibus læsam, tamen si hæc restitutio pluribus modis obtineri, facile possit, liber omnino est ad eum eligendum, quo uti libuerit. Erit ergo prorsus iniquum pactum impositum ab Eraniſto, quod ipſum spoliaret hac libertate, & ipſum obligaret ratione mutui ad famam restituendam, suæ Apothecæ frequentatione.

Si vero Cajus alia ratione famam refarcire non potest, nisi Apothecam frequentando, dico, Eraniſtem etiam ratione mutui posse de hac re cum ipſo convenire. Licet enim, ut inquit Navarrus, non possim exigere ex mutuo, quod mihi deberetur ex charitate, quia tunc induco per mutuum vinculum iustitiæ, quod est fortius vinculo charitatis, atque adeo commodum ex mutuo reporto; Si tamen mutuo gratia recuperandi, quod mihi liquido ex iustitia deberetur, non sum usurarius. Ratio autem est, quod hanc recuperationem non intendit ratio mutui, sed ratione iustitiæ, nec aliquid commodum ex mutuo reporto, quod mihi ex iustitia non deberetur. Hæc etiam est Doctrina Molinæ d. 309. Si ergo Eraniſtes hac Apothecæ frequentatione, de qua cum Cajo pactum scitur, sibi solum proponat famæ restitutionem, alia via non obtinendam, usurarius non erit.

M E N S E N O V E M B R I.

CAS. I. CUM Apulejus mortali morbo inopinate corripitur; Capellanus præsens infelici casu perterrefactus, post absolutionem a peccatis, ei administrat extremam Unctionem, adhibendo scilicet, quasi necessitate cogente, oleum simplex ex olivis expressum ab Episcopo non benedictum.

Qu. num ejusmodi unctio rationem habeat Sacramenti?
Resp. Legenda esse super hac re, quæ doctissime scribit in Opere de Synodo Diocesana libro 8. c. 1. n. 4. Benedictus XIV. ubi opiniones præcipuas erudite proponit, & Auctores recenset, quorum doctrina erudiri debemus. Nos enim, ut more nostro paucæ dicamus; quæ certæ sunt asseremus, remittendo ad fundamenta, quæ vel ab ipſo recensentur, vel proponuntur alibi inquirenda; quod vero obsecramus relinquimus; proposita.

posita dubitandi ratione; aliorum arbitrio definiendum relinquemus. Certum itaque est, oleum in extrema Unctione adhibendum esse debere Episcopi benedictione antea consecratum. Certum pariter est, Romanum Pontificem posse concedere hanc facultatem Presbyteris, ut Sacramentali benedictione oleum hoc ab ipsius consecratur, validumque esse Sacramentum, si oleo administretur, Pontifice concedente, hac ratione a Presbyteris consecrato. Au autem Sacramentum sit validum, si ministretur cum oleo, neque ab Episcopo, neque a Presbyteris peculiari Pontificis concessione ad hoc delegatis consecrato, ut hoc inuotescat, asseram Iuvenini sententiam *dis. 7. de extrema Unctione Q. 3. c. 1.*, ut ejus Doctrina proposita, quisque pro libito vel in ejus opinione concedat, si ipsa placuerit; vel si secus ab ipsa dissentiat. Statuta itaque hac conclusione, *quod nulla consecratio sive ab Episcopo, sive a Presbytero peracta necessaria est, ut Sacramentum valeat*, sic Vir clarissimus ipsam ostendit.

1. Nec in scriptura, nec in traditione reperire est aliquid, quo astruatur necessitas, de qua hic est questio. 2. Nullius sunt ponderis ea, quibus opinio contraria nititur. Ideo enim asserit, absolute requiri consecrationem illam, quod ex Apostolo Jacobo unctio fieri debeat in nomine Domini. — Quod Ecclesia damnavit Waldenses, qui rejiciebant ejusmodi consecrationem. — Quod (ait Bellarminus) Eugenius Papa IV., & Conc. Trid. doceat, consecratum oleum esse hujusce Sacramenti materiam; cum e contra cum agunt de Baptismo, definiunt, aquam naturalem esse illius materiam, omissa benedictione, qua solet consecrari.

Sed non est, cur ea argumenta quemquam moveant: Siquidem his Jacobi verbis *in nomine Domini*, non significatur benedictio, sed quod Minister vice Christi fungatur, agat illius auctoritate, dum inungit infirmum. — Waldenses merito proscripti fuere, quod impium sit ritus Ecclesiasticos superstitionis insimulare, aut eos contemnere, ut insimulabant, & contemnebant Waldenses. — Eugenius IV., & Conc. Trid. ideo benedictionis, olei, non aquæ Baptismalis meminere, quod item Scholasticorum. An illa benedictio necessaria sit, ut valeat Sacramentum, an non sit necessaria, dirimere noluerint. Sat fuit Eugenio Armenos docere ritus Latinorum. Hunc sibi Synodus Tridentina scopum præfixit: damnare nimirum hæreticorum dogmata, non autem, quæ salva fide Scholastici placita defendunt. Hæc Juvenin loco citato.

Hæc tamen argumenta, quæ Theologos recentiores in ejus traxere Sententiam, non ita movent Laurentium Berti. Nam vetustiorum mentem inquirens, qui numero longe majores, auctoritate, & doctrina saltem pares oppositam opinionem tenuerunt, arbitrat utriusque perpensis, certum non esse valere Sacramentum extreme Unctionis oleo non consecrato collatum. Ad quod suadendum præter alia argumenta, quæ apud ipsum videri possunt lib. 5. c. 4. offert postremo loco, quod statuitur in 3. Synodo Mediolanensi in hæc verba: *Parochus si per errorem aliud oleum, quam quod infirmorum est, ad agrotum unguendum adhibuerit, etiamsi Chrismatum, aut Cathacumenorum sit, ut erratum emendat olei sacri, quod proprium infirmorum est, eidem adhibeat, & tunc Sacramenti formam staret.* Animadvertit autem vir clarissimus, quod si

putassent Patres, valuisse Sacramentum hoc modo collatum; iussissent quidem caute suppleri, quod fuerat incaute prætermisum, scilicet auctoris, sed formam repeti non præcepissent.

CAS. II. Parochus *facili negotio* subdelegat Capellanum ad impertiendam infirmis in articulo mortis Apostolicam Benedictionem.

Qu. utrum jure?

Resp. negative. Colligitur hoc tum ex Bulla Benedicti XIV. quæ incipit *Pia mater*; tum ex Notificatione Illustrissimi; & Reverendissimi D. D. Lætantii Felicis Segæ super usum ejusdem Bullæ emanata die 8. Junii anno 1747. Hæc enim Notificatio ad hanc impertiendam Benedictionem delegat Parochos tam Civitatis, quam Diocesis, & quatenus legitimo impedimento detineantur, delegat etiam eorundem Capellanos. Patet enim ex hac concessione, quod Parochus debet esse legitime impeditus, ut Capellanus habeat hanc facultatem. Invisio autem legitimo Parochi impedimento, posse Capellanum hanc Benedictionem impertiri, non quidem tamquam subdelegatum a Parocho, cui non conceditur hæc subdelegandi facultas, sed suo quasi jure; ipse enim, Parocho impedito, delegatus remanet eadem auctoritate, qua delegatus est Parochus. Quod si perperam ageret Parochus *facili negotio*, Capellanum, subdelegans, a fortiori perperam ageret, si quemlibet pro arbitrio Sacerdotem ad hoc munus deputaret. Quale autem esse debeat legitimum hoc Parochi impedimentum, determinari poterit ex consuetudine Ecclesiæ, pro ut colligitur ex ipsa Bulla *Pia mater*. Si enim diu viguit hæc consuetudo, ut facultas hæc solis Episcopis de triennio in triennium ipsam petentibus concederetur, & cum ea restrictione, ut deberent exercere ipsam per se ipsos, & solum nocturno tempore casu legitimi impedimenti pro ea vice tantum possent illum delegare; hæc certe consuetudo docere Parochos debet, quanti Ecclesiæ faceret hanc facultatem, & quantum propius in hac etiam majori concessionis amplitudine curare debeant, ut non nisi vere impediti non prætermittant per se ipsos exercere.

CAS. III. Capellanus subdelegatus post extremam Unctionem, daturus infirmo Benedictionem Apostolicam impertire, illum videt agentem animam.

Qu. num, urgente mortis articulo, ejusmodi absolutionis formulæ contrahi possit; & quæ verba in tali casu proferenda sint, & quæ omittenda?

Resp. Satis in hac re provisum esse in eadem Bulla *Pia mater*, concludit enim: Si vero infirmus sit adeo mortis proximus, ut neque Confessionis generalis faciendæ, neque præmissarum præsum recitandarum tempus suppetat, *flam Sacros. benedictionem ei imperiatur*, incipiendo nempe ab iis verbis *Domine noster Cr.*

M E N S E D E C E M B R I.

CAS. I. **H**iberno tempore ad declinandam frigoris intemperiem Eventus Sacerdos in stabulum se se recipit, ibique Horas Canonicas persolvit.

Resp. cum Giribaldo *trist. P. in t. præ. de d. 3. 11.* Pro recitatione privata nullum ab Ecclesiâ locum determinari. Afferre quidem Patrum, & Bonacinam, excipi immunda loca, in quibus recitare dicunt esse.

esse veniale, propter quamdam irreverentiam; & probabilius neque in hisce locis ullum peccatum committi, dummodo id fiat debito modo extra contemptum; ubi enim licet orare mente, ibi etiam licet orare voce. Id porro confirmant verba ps. 102. *In omni loco dominationis ejus benedic anima mea Domino*; quo in loco ait Glossa: *Ubi non dominatur, ibi non benedicatur; ubique dominatur, ubique benedicatur*, nullus excusetur; & de facto Job orabat in sterquilino, Jonas in ventre Ceti, & Daniel inter Leones, & sic potest ubique officium recitari. Cum ergo Eventius noster, honesta causa, nempe ad frigoris interperiem declinandam, in stabulum se recipiat, neque ad contemptum id faciat, & supponatur tum mente, tum ore, tum corde hanc recitationem absolvere, & præter loci qualitatem nullum alium defectum admittere, dicendum erit recitare decenter.

CAS. II. Parochiani nonnulli, dum Fests diebus Ecclesiam adeunt, illam armati ingreditur; ipsique Sacrum audiunt vel *reticulis*, vel *pileolis* capita cooperti.

Qu. Utrum graviter sint a Parocho reprehendendi?

Resp. ad pr. affirmative, nam hoc revera prohibetur Inst. 99. Benedicti XIV., qui hujus prohibitionis rationes adducens, ex ordine ostendit, Sacros Canones prohibere ad Sacras Aedes cum Armis accedere — & Carolum in primo Provinciali Concilio decernere, nemini licitum esse armam, vel telopetos, balistas, aliave ejusdem generis Arma in Ecclesiam inferre — in suis Institutionibus sic alloqui Vicarios Foraneos — *Satagite diligenter, ne fideles, cum ad officia religionis celebranda conveniunt, Arma deferant, saltem hastata, neque alia concipiendi igni accommodata. Addit Synodum nostram Bononiensem Cardinali Jacobi Boncompagni lib. 1. c. 10. ita statuentem: Templum Dei pacis, non armorum locus est. Presenti Decreto arma quacunque hastata, sive ad concipiendum ignem constata inferri prohibemus; sub penis nobis arbitrariis: nec mare castrorum deponantur apud parietes intus Ecclesiam, aut foris, non enim parietibus, sed orantibus Sacre panduntur Aedes. Quibus Decretis, postquam alia in eam rem firma argumenta erudite adjoecerit, gravissime Parochos exhortatur, ut curam omnem adhibeant, ne hæc corruptela propter eorum negligentiam propagetur, & ubi invaluit, morem indignissimum omni adhibito studio eliminare conentur. Hæc autem decreta renovanda censuit Archiepiscopus noster Emin. Card. V. Malvetius, qui Elicto promulgato anno 1756. super venerationem Ecclesiis debitam, tum alia plurima sapienter, & religiose providit; tum super hac re hæc habet expressa verba: *Niuno ardisca di entrare in Chiesa di privata autorità, con Arme da fuoco, o Arme in Asla, nè almeno si faccia lecito di appoggiarle come in deposito al muro interno, ed anche esserne di essa; imperciocchè la Casa di Dio, non è una Piazza d' Arme, ma luogo di pace aperto a quelli, che vi si radunano per adorare il Signore.**

Hinc pariter ad alteram partem respondeo affirmative, jure scilicet Parochum eos graviter reprehendere, qui Sacrum audiunt pileolis, vel reticulis capita cooperti. Si enim, ut inquit Apostolus 1. ad Corinth. 1. *Omnis vir orans velato capite deturpat Caput suum*, quanto magis dicendum erit, Dei majestatem offendere, qui non modo privatim orant, sed cum hæc indecentia in Ecclesia Dei Sacrificio intersunt.

Agitur de hac re in eodem Edicto, quod modo laudavimus, ubi verbis Chrysostomi, & Bernardini Senensis, postquam cohiberit aliquorum mulierum impudentiam, quæ carnales & vanæ cum meretriculis ornamentis accedunt ad sacratissima loca, & quasi saltaturæ pergunt ad Dei Ecclesiam, relate ad homines ita prosequitur: *Per lo contrario gli Uomini debbano entrare in Chiesa, e starvi a capo scoperto, quindi proibiamo espressamente, e condanniamo la pratica de' Bottegari, e d' altra gente minuta, che suol tenere la beretta, o la rete in testa. Nè tollereremo l' uso delle medesime, se non quando la decenza, e l' infermità lo richiederanno.* His placet, superaddere, quæ in Synodo Imolensi statuta sunt anno 1766. ubi App. ad 4. partem Edic. 1. hæc hadentur: *Quanto è convenevole, che ogni Cristiano portandosi alla Chiesa procuri in se medesimo ogni possibile compostezza nel vestire, altrettanto è biasimevole, nè può tollerarsi l' uso troppo liberamente introdotto di comparirvi con vestiti indecenti, e domestici. Quindi proibiamo il portar nelle Chiese berettini da casa, reti, vesti da camera, e simili abiti di confidenza sotto-pene a noi arbitrarie.* Hæc autem omnia satis ostendunt, iustam fuisse in utroque capite Parochi reprehensionem.

CAS. III. Titius cum Cajō rixatus, ipsum intra Ecclesiam persequitur; ibique in eundem Cajum Sclopetum explodit; qui tamen nullo vulnere accepto ab Ecclesia aufugit.

Qu. Utrum Titius a quolibet Confessario absolvi possit?

Resp. negative. Nam Synodus Diocesana Bou. post ea verba, quæ superius retulimus a Benedicto XIV. citata, l. 1. c. 10. immediate prosequitur: *Quod si quis aut gladium distingere, aut sclopetum explodere criminosè ausus fuerit intra Ecclesiam, excommunicatione innodatum volumus, & declaramus, reservata nobis absolutione.* Confirmatur id ipsum in Edicto superius commemorato, ubi post verba a nobis allata sequitur immediate: *Che se saluto con arma bianca, o da fuoco, o in qualunque modo ardirà, non senza colpa d' offendere il Prossimo gravemente in Chiesa, vogliamo, che a norma dei Decreti del Sinodo Dioces. 10. sia immediatamente Scommunicato; ed oltrechè riserbiamo a noi la facoltà di assolverlo, non lasceremo di punirlo ancora con altre pene arbitrarie.* Neque obstat videntur illa verba d' offendere il prossimo gravemente, perinde ac si ad excommunicationem, & reservationem incurrendam non sufficiat sclopeti explosio in Ecclesia, ut habetur in casu, sed requiratur vulnus inflictum; nam imprimis Edictum hoc factum est ad normam Synodi, cui se conformat; Synodus autem, ut vidimus, solam exigit sclopeti explosionem. Deinde cum hoc statuatur in favorem Ecclesiæ, non debet aliud exigi, cum sola sclopeti explosione Ecclesiæ irrogetur injuria. Denique ut graviter proximus offendatur, inflicto vulnere non est necessaria, sed sufficit, quod gravis in ipsum adhibeatur violentia.

LAUS DEO.

CASUS

CASUS RESOLVENDI²⁹

IN DIOECESI

ANNO 1770.

MENSE JANUARIO.

CAS. I. **C**hrysoſtomus Jubilæi tempore in occasione proxima conſtitutus, atque propterea ſine abſolutione dimiſſus quoad uſque ab ipſa recedat, redit ad Confeſſarium occasione ſerio reſiſta, ſed interea elapſo jam tempore Jubilæi peccatum reſervatum commiſit.

Qu. An Chryſoſtomus in hiſce circumſtantiis poſſit acquirere Jubilæum, atque ejus privilegio abſolvi ab hoc reſervato.

CAS. II. Silverius cum tempore Jubilæi acceſſit ad Confeſſarium, & ab ipſo obtinuit abſolutionem a cenſuris, habebat in animo implendi reliqua opera, & Jubilæum vere lucrandi, poſtmodum vero culpabiliter hoc prætermiſit.

Qu. An per hanc omiſſionem reincadat in eandem cenſuras.

CAS. III. Cecilia tempore Jubilæi adit bona fide Confeſſarium complicitatem in re venerea, atque ab ipſo obtinet abſolutionem peccatorum, inter quæ erant quædam reſervata, & cujuſdam voti commutationem; elapſo autem Jubilæi tempore, exorto dubio, adit ſimplicem Confeſſarium, qui ipſam edocet de nullitate illius Confeſſionis, & poſtea eadem Confeſſione audita abſolvit etiam a reſervatis, & votum permutat.

Qu. An hic ſimplex Confeſſarius bene ſe geſſerit.

MENSE FEBRUARIO.

CAS. I. **T**iburtius contrahis valide ſponſalibus cum Caja, iſdem in ſuo robore permanentibus, contrahit nova ſponſalia cum Mævia. Interim Caja moritur.

Qu. An teneatur Mæviam ducere.

CAS. II. Flaminius Cajo petenti centum aureos, libenter mutuat, non quidem in numerata pecunia, ſed exigendos a creditore, a quo ipſe non poſſet exigere ſine difficultate, labore, & expenſis.

Qu. An ſit uſurarius.

CAS. III. Petronilla penitentis oblita cum erubeſcat iterum accedere ad confeſſionale, mittit famulam, ut Confeſſarium interroget de ſatisfactione ſibi impoſita.

Qu. An Confeſſarius id manifeſtans frangat ſigillum?

MENSE MARTIO.

CAS. I. **P**lautilla pia Fæmina, & dives Maritum naſta perditæ conſcientiæ, tota eſt ut promoveat ipſius bonum ſpirituale, conit.

continuis Eleemosinis, & Missarum celebratione, qua in re ingentes facit expensas.

Qu. An hoc ipsi liceat?

CAS. II. Faustinus tribus jam ab hinc annis & ordinatus in Sacerdotem, & approbatus in Confessarium, toto hoc tempore nec unquam celebravit, nec unquam Confessiones excepit.

Qu. An ut utraque hac omissione peccaverit graviter, & quot peccata commiserit?

CAS. III. Parochus vocatur ad puerum graviter ægrotantem, qui licet nonum annum attigerit, dubium ipsum relinquit, an adhuc obtineat perfectum usum rationis.

Qu. I. præciso hoc dubio an debeat hac occasione ipsum communicare, licet nondum communicaverit. II. Posito hoc dubio quid agere debeat?

M E N S E A P R I L I.

CAS. I. Alcibiades furatus Cajo Horologium, & centum Aureos; Horologium idem, & æquivalentem pecuniam tradit Confessario, ut pro ipso restituat. Moritur Confessarius, nondum facta restitutione, & bona hæc Confessarii credita transeunt ad hæreses.

Qu. An Alcibiades, cum hæc nequeat recuperare, ne prodar se ipsum, teneatur alia via restituere?

CAS. II. Lucillus graviter læsus ab Antonio, non animo vindictæ, sed ad leniendum dolorem, prorumpit coram amicis in graves querimonias, quibus injuriis infamatur.

Qu. An graviter peccet, & compensare teneatur?

CAS. III. Titius emisit votum Communicandi qualibet feria sexta.

Qu. I. An vi hujus voti teneatur petere Communionem in Feria sexta Parasceve.

Qu. II. An Parochus, dempta occasione Viatici, possit ea die Eucharistiam petentibus administrare?

M E N S E M A J O.

CAS. I. Parochus, cujus Ecclesiæ divite Benefactore donatum est Ostensorium magni pretii, cum in ipsa Ecclesia Ostensorium aliud habeatur pariter magni pretii, sed Calices argentei pro ejus opportunitate deficient, convenit cum alio Parocho, in cujus Ecclesia abundant Calices, deest vero Ostensorium pretiosum, & servata æqualitate, peritorum judicio, absque ulla juris solemnitate Calices cum Ostensorio permutat.

Qu. An fecerit contra Bullam *Ambitiosa*, aut alia jura assensum Apostolicum exigentia.

CAS. II. Pamphilus accepta pingui Eleemosina pro Missæ celebratione, dedit alteri celebrandam, retenta magna parte stipendii,

Qu. I. an debeat restituere. II. Cui facienda sit hæc restitutio, an Domino a quo accepit Eleemosinam, an Sacerdoti, qui celebravit?

CAS. III. Mos erat in quadam Parochia, ut quoties fiebat publica Supplicatio in festo Sanctissimi Corporis Christi, qui telas venales habebant,

31

bant, ea gratis commodarent Ecclesiæ; ut pendulæ expanderentur ad umbram procreandam. Sed quoniam aliquando accidit, ut orto repente turbine, damnum aliquod passi sint, convenerunt simul, & iuramento interposito se obstrinxerunt, ne amplius commodarent, adiecta pœna, ut qui contra fecerit, solveret aureum publico Valeriano.

Qu. An hoc iuramentum sit validum, & an teneantur contravenientes ad hanc pœnam solvendam?

MENSE JUNIO.

CAS. I. **V**alerianus bona fide emit equum a fure, eumque vendit eodem pretio; postquam, cum sæpius commodando, quinque aureos lucratus est. Post hanc venditionem compareret verus Dominus, qui equum aliunde recuperare non potest.

Qu. An Valerianus pretium equi teneatur Domino restituere; aut quidpiam aliud?

CAS. II. Decedeus Aquilius sine hæredibus necessariis, relinquit hæredem Ecclesiæ Parochialem, sed hereditatem onerat pluribus legatis, quorum alia respiciunt celebrationem Missarum pro ejus suffragio, alia dotes in puellas pauperes arbitrio Parochi erogandas, alia vero splendidos sumptus pro quadam solemnitate cum magna pompa celebranda, quæ quidem legata ita absorbent hereditatem, ut vix quidquam pro Ecclesiâ hærede remaneat.

Qu. An Parochus in adenda nomine Ecclesiæ hac hereditate possit uti beneficio legis falcidiæ, detrahendo scilicet ab ipsius legalis statutam portionem in utilitatem Ecclesiæ.

CAS. III. Domitilla virgo precibus importunis ab Erastio juvene sollicitata, deslorari patitur; nam nisi statim id faciat, videt ipsum non desisturum, aliisque domum accedentibus, stupri iustitiam subitura est.

Qu. An Erastus in hac circumstantia teneatur aut dotare, aut nubere.

MENSE JULIO.

CAS. I. **P**arochus ad infirmum vocatus, cum ex illius Confessione audiat esse concubinarium, & quidem cum prole suscepta, suadet Matrimonium. Ipso annuente, ut secrete hoc peragatur, adhibet testes duas ex mulieribus domesticis facti jam conscias.

Qu. An hoc Matrimonium sit validum?

CAS. II. Idem Parochus ab eodem infirmo rogatus pro testamento condendo, cætera prout de jure persolvit, sed det cautius secretum custodiat, easdem sœmias adhibet testes.

Qu. an hoc testamentum sit validum?

CAS. III. Villicus, qui plura ideatidem surripuit, & quidem notabiliter Domino diviti, tum siue incommodo restituere non possit, monetur a Confessario, ut petat a Domino condonationem. Villicus autem benigniorem speraus Domini uxorem, ipsam adit, & generaliter petit, ut si quid de rebus Domini in propriam utilitatem consumpserit, velit condonare, quæ libenter annuit.

Qu. An ejusmodi condonationem ab onere restitutionis liber evadat?

MEN-

CAS. I. **C**onfessarius in executione litterarum Sacre Pœnitentiariæ, quibus nomine Titii postulavit facultatem absolvendi pro quodam impedimento dirimente, cum legat in ipsis litteris clausulas aliquas limitantes hanc facultatem, Querit a Titio an habeantur in casu ex circumstantiæ, quibus positus irrita esset hæc absolutio; qui Titius respondet non haberi.

Qu. I. An Confessarius debeat exequi has litteras, licet aliunde certo sciat irritam futuram hanc absolutionem.

Qu. II. quid faciendum si hoc ex præauditis Confessionibus ejusdem Titii.

CAS. II. Parochus committit Capellano, ut in Ecclesia Parochiali assistat Matrimonio Cajæ cum Titio. Capellanus vero, non modo non fingitur hac facultate in Ecclesia Parochiali, sed vocatus a Cajâ in alia domo extra Parochiam, ad quam se receperat ratificandi causa, ibi assistit Matrimonio.

Qu. An valide.

CAS. III. Leopoldus in Confessione generali cujusdam feminæ audit, ipsam tribus ab hinc annis fuisse sollicitam in actu Confessionis, interrogat an denunciaverit, quæ respondet non habuisse morivum, nam Confessarius non multo post pœnitentia ductus, ipsi veniam petiit, monitis salutaribus scandalum abstulit, & magna pietatis fama postea vixit.

Qu. An his non obstantibus debeat Leopoldus ipsam obligare ad denunciandum?

MENSE SEPTEMBRI.

CAS. I. **H**ermogenes mutuatur Alberto contrum auream accepta loco pignoris eximia pictura, tanti æstimata a peritis. Adjicit vero hoc pactum contractui, ut si Albertus intra annum sortem non restituat, pictura oppignorata cedat loco sortis in dominium mutuantis.

Qu. An hic contractus sit licitus?

CAS. II. Parochus accitus a Confratribus Sodalitatis ad facienda sacra solemnia, commendat suum Capellanum anteponendum Capellano Confratrum pro fungendo munere Diaconi.

Qu. An jure.

CAS. III. Præsentius Egrotans ad mortem, religiose petit a Parocho Confessionem, & Viaticum, solumque admonet, ne verbum faciat de æterna Uctione, non quidem quod ipsam contemnat, sed quod ad ipsius memoriam tristitia, & horrore perturbetur.

Qu. An Parochus si blande nequeat tristitiam hanc amovere, possit ipsi tandem acquiescere.

MENSE OCTOBRI.

CAS. I. **D**ubitans Aliprandus an esset media nox, tamen comedit; Basilii vero certo quidem in media nocte a comessione cessavit, sed inter horologia hanc indicantia deleget ultimum.

Qu. An uterque possit ad Communionem accedere?

CAS.

CAS. II. Domitilla hausta aqua ad hos abluendum, dubitat, an guttam aliquam deglutierit.

Qu. An posito hoc dubio a Communionem debeat abstinere?

CAS. III. In quoquam Oratorio publico celebratur singulis annis, Festum Sancti Titularis, ita quidem, ut aliquando celebretur in die propria, saepius vero in Domenica, quæ est infra octavam. Sacerdotes vero, qui in eodem Oratorio ad celebrandum confluunt, recitant Missam de Titulari cum *Gloria*, & *Credo*.

Qu. An bene se gerant?

M E N S E N O V E M B R I.

CAS. I. **O** Ccurrente Festo Titulari, vel Consecrationis Ecclesie Parochialis, orta est quaestio inter Sacerdotes, qui in eadem Parochia habent permanentis domicilium, an ipsi de Titulari, vel de Consecratione Officium cum octava jure valeant recitare.

Qu. A Parocho hujus quaestiones solutio?

CAS. II. Parochus certo sciens, infantem in parru periculoso fuisse ab obstetrice rite baptizatum, tamen ad solatium parentum, qui hunc baptismum non acquiescunt ipsum rebaptizat. Archipresbyter hoc audito ipsum reprehendit tanquam factum irregulare, addens, quod ad hoc praecavendum debebat baptizare sub conditione.

Qu. I. An vere hic Parochus factus sit irregularis.

Qu. II. An evasisset irregularitatem Archipresbyteri consilium exequendo.

CAS. III. Cum Rubrica Missalis, quæ præmittitur Missæ votivæ de Sponso, & Sponsa præscribat — *Si benedictio nuptiarum, facienda sit die Dominico, vel alio die Festo, dicatur Missa de Dominica, vel Festo &c.* quidam contendunt per hæc verba vel alio die festo, festum intelligi de præcepto, ideoque inferunt, posse Parochum in nuptiarum benedictione dicere Missam votivam de Sponso, & Sponsa in festo etiam duplici non de præcepto.

Qu. An sic explicantes præfatam Rubricam, verum assequantur ejusdem sensum.

M E N S E D E C E M B R I.

CAS. I. **C**ontraitis Sponsalibus inter Ircanum, & Apolloniam, factisque denunciationibus, Ircanus manifestat Parocho, se non posse ducere Apolloniam, obstant enim sponsalia (quod antea nesciebat) secreto ab ipso contractum cum ejus sorore jam defuncta. Postmodum vero adit Parochum, & aperte fatetur, se hoc impedimentum falso excogitasse, ut haberet justum motivum resiliendi a sponsalibus; poenitentia enim ductum se retractat, & paratus est ad Apolloniam ducendam.

Qu. An Parochus hac audita retractatione possit tuto ad matrimonium procedere?

CAS. II. Hermogenes audiens ab Antonio, ipsum esse paratum ad nominandum Rudolphum pro Parochia sui Patronatus, atque ad legandos in ejus favorem centum aureos, ipsi præ oculis ponit alium Sacer-

Sacerdotem, & licet noverit minus dignum Ridulpho; tamen ipsum ita laudat, ut Antonius mutata voluntate, tum in Parochia, tum in centum aureis ipsum substituat.

CAS. III. Pamphilus emisit votum jejunandi qualibet feria secunda. Cum autem hoc anno incidat in eadem feria pervigilium nativitatis Domini.

Qu. An obstat hoc votum, quominus uti possit benigna illa tolerantia, quæ in hoc pervigilio permittere solet refectiunculam copiosorem?

F I N I S.